

ርእሰ ኢሳይያስ፡ ልኡክ መንዝመት መጅልስ ቅራን ዲብ ቀር አፍሪቀ ልትከበት

ርእሰ ኢሳይያስ አፍወርቂ፡ ፍንቱይ ወፍድ መንዝመት መጅልስ ቅራን ዲብ መንጠቀት ቀር አፍሪቀ - ሚስተር ጉዋንግ ኮንግ፡ ዲብ ቃዕት ደንደን እንዲ ትከበቱባቸው ሀድግ ምስሉ። እቲ ዲብ ቀድያት ወተጠውራት መንጠቀት ቀር አፍሪቀ ለአተንከበት ሀድግ፡ ርእሰ ኢሳይያስ ዶር መንዝመት መጅልስ ቅራን ዲብ ሕሉል ፈንጪጋር እብ ገይሶ ለዐለ ገበይ ፍሬ ወፍገራት እግል ለአምጽእ ክም ኢትቀድረ ሸርሐ።

ርእሰ ኢሳይያስ እንዲ አትሉ፡ ዲብ አፍሪቀ ለሳድፍ መሻክል ሌጠ፡ ረፊዕ መስክልየት እብ ነቅሶ ምኑ አግቡይ፡ ሕፍዝ ሰላም እንዲ ከስኢክ ሰላም እግል ትትረከብ ክም ኢትቀድር እት ወዲሕ፡ ለሰብ መንዝመት መጅልስ ቅራን በይነ ለትትሐሚ እቱ እንዲ ኢጉብእ፡ ፍገራት ሓድር እድንያይ ገዛም ሰበት ቱ እግል ልትበደል ክም ቡ ሐበረ።



ዶር ናይ መንጠቀት መንዝመት እብ ከስሰ ህይ፡ እግል ሀድፍ እመር ለተአሰሰ ምንመ ጉብእ፡ እብ ሰብ ላዋሽ-እይይ ካርጅ፡ አስክ እለ ለተአሰሰ እግሉ ሀድፍ እግል ለሐቅቅ ኢቀድረ ሌጣ እንዲ ኢጉብእ፡

መሻቀዩ አጃንዳት ቅዋት ካርጅ ክም ጉብእ አፍሀመ። ቅድየት ሱዳን እብ ከስሰ፡ ርእሰ ኢሳይያስ፡ ኤረትርያ ምስል ሱዳን እብ ህሌት እግል ሸራኩት፡ እግል ሰላም ወመስኩብትለ ዐድ ዶረ

እግል ተአግዲ ዲብ ሰነት 2022 እት ጅንሰየት ለ'ተንከበ ገዛም ሸበቢ እግል ልትአሰሰ ለሰዲ አፍካር ክም ቀደመት፡ ምናተ እብ ሰብ መትአታይ እይይ ካርጅ ክም ተዐንቀፈ ወመሻክል ሱዳን

ዲብ ትኬለመ እትጅሁ ክም ሄረረ ሸርሐ።

ፍንቱይ ልኡክ መንዝመት መጅልስ ቅራን ዲብ ቀር አፍሪቀ ሚስተር ጉዋንግ ኮንግ ዲብ ሀበዩ ሐብሬ፡ እለ ዝያረት እለ ክፋል ናይለ እትሊ ባካት ወድዩ ለሀለ ናይ መትአግር ዝያረት ክምተ እንዲ ሸርሐ፡ ምስል ርእሰ ኢሳይያስ አፍወርቂ ቤንያይ መፋህማት ክም ወድ፡ ወእግል ሰላም ወመስኩብት ናይ እለ መንጠቀት ምስል ኤረትርያ ምን ቅሩብ እግል ልሸቄ ዱሉይ ክም ቱ ሸርሐ።

እቲ ሀድግ፡ ወዘር ካርጅየት አሰይድ ዑስማን ሳልክ ወመመቅራይት መአሰሳት መንዝመት መጅልስ ቅራን ዲብ ኤረትርያ ሚስ ናህለ ሻልጂ ሓድራም ዐለው።

ፍንቱይ ወፍድ መንዝመት መጅልስ ቅራን ዲብ ቀር አፍሪቀ ሚስተር ጉዋንግ ኮንግ፡ ዲብ ሐልፈ ወሬክ ጁላይቱ እለ መስክልየት ለነሰእ።

አማላይት-ከርከበት፡ ሳምን ዓዳት ቀውምየት ብዳዊየት ልትሰርገል

ሳምን ዓዳት ቀውምየት ብዳዊየት ምን ዮም 13 አስክ 17 ኖቬምበር እት አማላይት ምዴርየት ከርከበት ትሰርገሉ።

እት አቅሊም ጋሽ-በርከ ውርስ ዓዳት እንዲ ተሐፈዘ እት አግማም እግል ልትዐዴ እብ ጉብእ ሀለ ጅሀድ፡ 3 ምዴርየት ለሻረከዩ እቱ፡ እት መትአግር ወሕዋዘት ውርስ ዓዳት ቀውምየት ብዳዊየት ለረከዘ ሳምን ዓዳት፡ ምን ዮም 13 አስክ 17 ኖቬምበር እት አማላይት- ምዴርየት ከርከበት ትሰርገሉ።

እቲ “ወርስ ዓዳትና እብ መሻረከት ዛይደት ነኣደቅብ” እብ ትብል ሰቅራት ለገኦ ሳምን፡ ለትፈናተ ወራት ዓዳት ለሸምል ጅግረ፡ እት ፍንጌ ሐሸምት ዓዳት ቀውምየት ብዳዊየት እት ምዴርየት ፎርቶ ሳዋ፡ ሰልዓ ወከርከበት ገኦ።

ሙዲር ምዴርየት ከርከበት አሰይድ ዐብደልከሪም እድሪስ እቲ አስመዐዩ ከሊመት፡ ለ3 ምዴርየት፡ አንፋር ቀውምየት ብዳዊየት እብ ብዝሐ ልብኢትን ምን ገኦዩ ክምቱ እት ሸርሐ፡ እግል እብ ደረጃት ወርስ ዓዳት እግል ልትሐፈዝ ወእት ወጠንያይ ጅግረ ክም ልትቀደም እግል ልግበእ ለገብእ ጅሀድ ለተአደቅብ መግደረት ክምተ ሸርሐ።

ሙዲር ዓም ቅስም ዓዳት ወርያደት አሰይድ እድሪስ ሳልክ እብ ተራቱ፡ ለሳምን ዓዳት፡ እምበለ እት ወርስ ዓዳት ለለአገደዩ ዶር፡ መትነፋሶ

እት መአሰሳት ከደማት እጅትማዕየት ወፊህም ድሀር እት ሕፍዝ ወርስ ዓዳት እግል ልትሓየሰ ተረት ዐባይ ክምቡ አፍሀመ።

መፈወድ ዓዳት ወርያደት ሰፊር ዘመዴ ተክሌ ወሓክም አቅሊም ጋሽ-በርከ ሰፊር መሕመድ ዐሊ ሕሩይ እብ ተራቶም፡ ለመግደረት ምህም ሰበት ገኦት፡ እቲ ብዕድ ቀውምየት'መ እግል ልተላላ እት ለአትፋቅዶ፡ እግል መመቅራት ወለጽበዋ ሐመደው።

እት ደንገቤ ምዴርየት ሰልዓ ፈዳቢት ናይለ ሳምን እንዲ ገኦት ጃኢዘት ነሰኦት።

እሊ ክእን እት ሀለ፡ እብ መናሰበትለ ሳምን እብ ፈደሬሸን ጅግረ እንሰ አቅሊም ጋሽ-በርከ ለትዝመ፡ ምዴርየት ሰልዓ፡ ከርከበት ወፎርዮ ሳዋ ለሻረከው እቱ ጅግረ እንሰ ክም ገኦ፡ ወከሊ ኤሪነ ሐበረ።

ሰውድዮ ፡ ማህረጃን ኤረትርያን ልሰርገል



እት ክል ሐል ለገብእ መህረጃን ኤረትርያን ሰካን ጅደ-ሰውድዮ ምን ዮም 9አስክ 15 ኖቬምበር እብ ነያረት ትሰርገሉ።

እሊ ቁንሰል ዓም ዲብ ጅደ ወድዋረ አሰይድ ዐብዱራሕማን ዐብማን ለከስተዩ ወእብ መሻረከት መዋዋኒን ዛይደት ጋምል ለዐለ መህረጃን፡ ዕፌ ሰወር፡ ናይ ዓዳት ወነባሪ አላት ቅምያትኹ ባዛር

ፈርያት ኤረትርያት ዓይላት፡ አሸቃል ብሰር እዴ ወወራት ፈን ለከምክም ዐለ።

እቲ መናሰበት ዲብ ትዝመት ጅግረ ርያደት ህዩ እትለፈናተ ደረጃት ዕምር ለሀለው ሸባብ ወኣጀኒት ክም ሻረከው ምን ኣካን ለበጽሐተነ ሐብሬ አፍሀመት።

እት ውዛረት ካርጅየት ሙዲር ዓም ቅስም ዳኢራት ሰፊር

እስቲፋኖስ ሀብተማርያም፡ እግል መሻርከት ሓድረት ሓለት ወጠን ወዶር ወመሻረከት መዋዋኒን እቲ ክምስልሁመ ናይ መንጠቀት ወዓለም ተጠውራት ለከስሰ ሰሚናር ወደ።

እብ ሰበትለ ልሰርገል ለሀለ በራምጃት ዐማር ወሄራሩ ሸርሕ ፋይክ ለሀበ ሰፊር እስቲፋኖስ፡ ዲብ ካርጅ ለነብር መዋዋኒን እት በራምጃት ወጠን እብ ቀዱሙ ለህለው ዶር ሐቀ ሐመድ፡ እትለ መርሐለት ሐዳስ ፈዛዐቶም እንዲ ወቀለው ወውሕደቶም እንዲ አተረደው ክም ለአተላልዉ ዳምን ክም ቱ ሸርሐ።

መሻርከት እብ ጀሀቶም፡ መጦር ዐዶም፡ ሸዐም፡ ሕክ-መቶም ወዴሾም ፋርስ ክም በጥር እንዲ ሐበረው፡ ውሕደቶም ወመትዛዛም እንዲ አተረደው መካሰብ ወጠን እግል ልሕፈዞ ወለረሸዶ ክም ከድጥ አከደው።

ፖሊስ ኤርትርያ፡ ምህነት ፖሊስ ለአድረሰዮም ዝያድ 700 ነፈር አድሐረ

ፖሊስ ኤርትርያ፡ እግል መደት ክልኤ-ወሬክ ዲብ ዐዲ-ሃሎ እብ አሳሰያይ ምህነት ፖሊስ ለአደርሶም ለጸንሐ 154 አንሳት ለብኢቶም 761 አንፋር 37ይት ደውረት ክድመት ወጠን፡ ርእሰ ኢሳይያስ አፈወርቂ ለሐድረ ዲብ ዮም 13 ኖቬምበር ትደሐረው።

ዲብ መርከዝ ተእሂል ቅዋት ፖሊስ

ወአምን መስክል ፈሬዕ ድሩስ ምህነት ፖሊስ ሚጀር ዐንዶም መሐሪ እትለ አስመዐዩ ከሊመት፡ ደረሰ - አትአማር ምስል ርሳለት፡ አህዳፍ ወወራታት ፖሊሱ ወራታት መርከዝ ፖሊስ ወዐቅቢት፡ ቃትን ወብሐሰ ጀሪመት፡ ዕላቃት ዓም ወድሩስ ጅንሰየት፡ ገበይ ቀደሞት ተቃረር፡ እብ ኮምፕዩተር ለጀሬ ጀራይም ወደሐን ሳይበር ክምስልሁመ ብዕድ

እሊ ለሸብህ አርእስ ለከምክም ድሩስ ክም ነሰኦው፡ ወለትትሐመድ ፍገራት ክም አምጽአው ሐበረ።

ቃኢድ ፖሊስ ኤርትርያ ኮሎኔል መሓሪ ጸጋይ እብ ጀሀቱ፡ ደረሰ እብ ነዘር ለደርሰው ድሩስ እንዲ አትመመው ዲብ ፈዓልየትለ ሸቅል ልትዐደው ክም ህለው እንዲ ፈህመው፡ ሰላም ወአምን ለልሐሸዋ፡

ክምስልሁመ ደሐን ወሕቁቅ ናይ መጅተማዕ ለለሐፍዞ ሰበት ቶም፡ ዲብል ልትወዘዩ ዲብ ኣካን እብ ገባይ-ናስሐት እግል ልሸቀው ተሐሰበ።

ዲብ ደንገቤ፡ ዲብል ተእሂል ፈዳበት ለአርአው ጅኢዘት አትናያት ነሰኦ እት ህለው፡ ፍርቀት ዐዳት ፖሊስ ኤርትርያ ዕፌ ፈን ቀደመት።

ዝክረት እድንያይት አምዕል ሕማም ስከሪ ዲብ መንደፈረ

እድንያይት አምዕል ሕማም ስከሪ - 14 ኖቨምበር: “ከደማት ሕክምና ስከሪ እት አካን ሽቅል አብጽሖት” እብል ትብል ስቅራት: እብ ደረጃት ወጠን ዲብ መንደፈረ ትዘክረት።

እትለ እት ዐድነ 24ይት ኢነት ለትዘክረት አምዕል: አሴራር ሽዑብ ወደረሰ ክምሰልሁመ በራምጅ አትፋዝያት ወፈን ለትቀደመ ዲብ በርናምጅ ቀርቡ። በዐልመንበር መሕበር ወጠን ሐመይም ስከሪ ዶክተር ጎይትአም መብራህቱ እትለ አሰመዐየ ከሊመት ህይ: መጅተማዕነ ለኢለዐዴ ሕማማት ለለአመጽኡ መሻክል እብ ፍንቱይ ህይ ሕማም ስከሪ እግል ልትከራዕ: ለትመሳኔት መነት ወንዝም ሐረከት ገርብ እንዴ ወዴ ዓፍየት እግል ልዕቀብ ተሐሰቡ።

እትሊ ወክድ እሊ ዲብ እዲነ ዝያድ ሰር ቢልዮን: ዲብ ዐድነ ህይ



ሐድ 100 አልፍ ሐመይም ስከሪ ክም ህለው እንዴ ሐበረ: ለአግደ ሰብብ ወሰትለ ሕማም: ዲብ ንዛም መነት ለንተብዑ አግቡይ ወኢውድየት ሐረከት-ገርብ ክምቱ አብርህ።

መስኡል ፈሪሶ ዓፍየት አቅሊም ግብለት ዶክተር አማኑኤል ምሕረትአብ እብ ጀህቱ: እብ ደረጃት

አቅሊም ምንለ ልትርኤ ሞት: ለ 72 ምእታይት እብለ ለኢለዐዴ ሕማማት ክም ስከሪ ወጨቅዮ-ደም ክምቱ እንዴ ሐበረ: እብ ፍንቱይ ሕማም ስከሪ: እብ መልሃየ ንዋያት ገርብ እንዴ ደመረ ዲብ ብቆት ለካሬ ሕማም-ድቁብ ሰበት ቱ: ሽዑብ ፈዛዐቱ እንዴ ወቀለ ዲብ ዓፍየት ጅህድ እግል ሊዴ መክረ።

መስኡል ምጅልሰ አቅሊም ግብለት መምህር ወልዳይ ገብሬ ወነትበት ጅብህት ሽዑብየት እግል ዲሞቅራዊየት ወዐዳለት አሰይደ አመቱ ንጉሴ እብ ጀህቱም: እብ ወክድ-ወክድ ለልትህየብ መሐደራት ዲብ ዓፍየትለ ሕማም ወመሻክሉ ፍገራት ዐባይ ሰበት ቡ: ሽዑብ ፈህሙ ለወቅል እብ አትፋዝያት

እግል ልግባእ እብ ገበይ-ንዝም እግል ልትከደም ዲብ አትፋቀደው።

ዲብ ደንጎቤ ምዲር ዓም ቅሰም መሕበራይ ክዳማት አሰይድ ቀልአብ ትሰፋሰላሴ: ሕማም ስከሪ መሻክል ዓፍየት ምን ግብአት እንዴ ሐልፈ ዲብ አፍረየት ለህለ መዋዋን ለለአደሚዕ ሰበት ቱ: ተቅዩር-ጠቢዐት እንዴ መጽኦ ሰብብ ሕማም ላቱ ለመድ ኤዝያይ እግል ልስረት እትለ ገብእ ጅህድ: እዳረት አቅሊም ዶረ ክም ትወዴ አክደ።

ዲብለ አምዕል: እብ መናሰበት እድንያይት አምዕል ለትዳለ ዕፌ ፈን ልትቀደም እት ህይ: ፍንጌ ደረሰ ጅግረ ማዕሉማት ዓመ ገብአ።

እምበል እሊ: ለአምዕል እት አቅሊም ግብለት በሐር ቀየሕ ወምግብመ እብ ለትፈናተ ወራታት ክም ትዘክረት: ወካይል ኤሪነ ሐበረው።

ዐንሰቡ: እግል ተጠውር ርያደት ልትከደም ህለ

ርያደት አሳሰ መጅተማዕ እንዴ ጸብጠት እግል ትጠወር ወአተላለዮት እግል ልትከደ እብ ገበይ ንዝም ወእብ ሕበር እግል ልትከደም: ሓክም አቅሊም ዐንሰብ ሰፊር ዐብደለ ሙሰ ተሐሰቡ።

እት ዮም 12 ኖቨምበር ዲብ ከረን እትለ ገብእ ናይ ሓል ጌማም ወራታት ፈደሬሽናት ርያደት እትለ ሐለፈየ ልእከት: ሰፊር ዐብደለ: ዐቦት ወአተላለዮት ርያደት ዲብ ሚዛንየት ለተንክበ ሰበት ቱ: ኩለን ምዴርያት እግል ርያደት ለፈግር ማል እብ ገበይ-ንዝም እግል ልሸቀየ እቡ: መጅተማዕ ህይ ዶር ፋዜዕ እግል ሊዴ ተሐሰቡ።

ምዲር ዓም ቅሰም ዓዳት ወርያደት አሰይድ ሰራጅ ሐጂ እብ ተረቱ: ወራታት ርያደት እግል ልጠወር ዶር መጅተማዕ እብ ዓመት: ዲብለ መጃል ለሸቁ ጀሃት ወመሸተርከት ህይ እብ ፍንቱይ እግል ል'ተረድ ትፋኑ።

ዲብለ ጌማም: ርያደት ዲብ

መዳርሰ እግል ትጠወር እብ ሕሰር እግል ልትከደም: መሻረከት አንሳት እግል ትዕቤ ተእሂላት እግል ለህሊ: ክምሰልሁመ ዲብ ምዴርያት ለህለ ፍረቅ እግል ል'ተረድ ጅህድ እግል ልግባእ እብ ርሒቡ ተህደጉ።

ዲብ ምዴርየት ከረን: ሐመልማሎ: ሐልሐል ወአሰማዋ ለትሸቀ ስዕ ሚዳን-ጨበል ዲብ ተጠውር ኮበራት እገር ዶር ምህም ወዴ ክም ህለ ዲብ ልትሸራሕ: እሊ ለሽብህ ብንየት ተሕትየት ዲብ ዐተከሌዛን እግል ልትሸቁ ስታት ክም ህለ በርህ።

ዲብ ደንጎብ መሻርከት: መሕዝዝ ሚዛንየት ሐል እግል ልርከብ ነዋዲ አቃሊም እግል ልትከደም እግል ልትከደም ዲቡ: ዶር ሙደራእ ምዴርያት ዲብ ተጠውር ርያደት እግል ልትወቀል: እተይ ርያደት እግል ልዕቤ: ክምሰልሁመ አሰክ ተሐት እንዴ ትደረክ ተእሂላት እግል ልትዝም ለልብል አራእ ወፊናታት ሓለፈው።

ዲብ ካርጅ ለነብር ኤረትርዩን እት አተራድ መትዛዋም ወዶሮም ለሀድጎ



ዲብ ሰዌሰረ ወአሚሪክ ወጅምሁርየት ግብለት አፍሪቀ ለነብር መዋወኒን: መትዛዋም እንዴ አ'ተረደው ዶሮም ዲብ በራምጅ ወጠን እግል ልወቅሎ ሀድገው።

መስኡሊን ኩለን ተናዚም ወመሐብር ኤረትርዩን ዲብ ሰዌሰረ እት ዮም 9 ኖቨምበር ዲብ ጅኔሽ እትለ ወደዉ እጅትማዕ: ናይ ሓል ወራታቶም እንዴ ጌመመው ዲብ በራምጅ መስተቀበል ሀድገው።

ዲብ ለአምዕል ለትደሐረት ቃዕት 'ናቅፈ' እትለ ገብእ እጅትማዕ: እብ ደረጃት መርሒት ለሸቁ ሐድ 150 መመቅርሐት ሻረከው።

መትምማይ ቅደይ ሰፋረት ኤረትርዩ ወቃይም ልኡክ ዲብ መነዝመት ሕቁቅ ሚንአድም ወብዕዳም በራምን ሕክሙት ላተን ተናዚም አሰይድ ሀብቶም ዘርአይ: ዲብ ሰዌሰረ መቅደረት ሰፋረት እብ ኩሉ ጀዋንበ እግል ትትወቀል: ለልትህየብ ከደማት እግል ልትወሳዕ ወልገርም ለገብእ ወቀይ ፍገራት ክም ትረክበ ምኑ እንዴ ሸርሐ: እብ

ኩሎም ጀሃት ለገብእ ጅህድ ሕበር ሐመደ። መስኡል ቅደይ ሽዑብ ወጃልያት አሰይድ ተወልዴ የውሃንስ እብ ጀህቱ: እት ሰነት 2025 ለገብእ በራምጅ ወለዐለ መጋብሃት ተቃራር-ጌማም ቀደመ።

አሰይድ ተወልዴ: እት ቀበት ሽዑብ ፈህም ሕበር እግል ልዕቤ ሰበት ቀድረ: ተናዚም ወመሓብር ሰባተተን ወመቅደረተን ለወቅል

ቅደይ ሰፋረት ኤረትርዩ ዲብ አሚሪክ አሰይድ ብርሃኔ ገብረህይወት ወመስኡለት ቅደይ ሽዑብ ወጃልየት አሰይድ ሐድነት ቀለቱ: ምን ዮም 1 አሰክ ዮም 3 ኖቨምበር: ቅደይ መነዝማት ወጠን ክምሰልሁመ መህረጃን ኤረትርዩ ሰነት 2026 እብለ ከሰቡ: ዲብ ዳሳስ ምስል ሽዑብ ህድግ ወደው።

ዲብለ እጅትማዕ: መነዝማት ወጠን እግል ልትወሳዕ ወል'ተረድ ክምሰልሁመ ሓድረት ሓለት ወጠን እብ መጅብ ተጠውራት ናይ መንጠቀት ወእዲነ ተህደጉ።

ዲብ ደንጎቤ: ለመጽእ መህረጃን ኤረትርዩን ሰነት አሚሪክ ዲብ



ለትፈናተ በራምጅ ፈዛዐት ሰበት ገብእ: ክምሰልሁመ መነዝማት ሐዳይሰ ሰበት ቁመየ: ፍገራት ለትሸቀ ወቀይ ክምቱ እንዴ ሐበረ: በራምጅ ሰነት 2026 ለክሰስ ሸራሕ ቀደመ።

መሻርከት ህድግ-ፋዬሕ ወዳ እት ህለው: መስኡል ማልየት ልጅነት ወጠን አሰይድ አማኑኤል ተኽለ ናይ ሰነት 2025 ተቃራር ቀደመ።

እብ ጀህት ብዕደት: መትምማይ

መዳነት ዳሳስ ሰበት ገብእ: ለለአትሐዚ መዳለት እጊድ ክም ሰ'ፌ እግል ልግባእ እግሉ ዲብ መፋህመት ትበጽሐ።

ክምሰሁመ: ሰፊር ኤረትርዩ ዲብ ጅምሁርየት ግብለት አፍሪቀ ወድወል መንጠቀት ግብለት አፍሪቀ አሰይድ ሳሌሕ ዑመር: እት ዮም 9 ኖቨምበር ዲብ መዳነት ጅሃንሰበርግ ወድዋረ ለነብር ኤረትርዩን ዲብ ሓድረት ሓለት ወጠን ወድወል ግዋረ እብለ ከሰስ ሰሚናር ወደ።

ጸሐፊዎችና ጸሐፊዎች

ክል አርብዕ ለትጠ'በዕ ጀሪደት

መዳልያይ:-

- መሐመድ እድሪስ

ለይአውት ወአርተያት

* ዘህረ ዐሊ

* ፋዋን አድም

ተለፎን: 121797/201820 (258)

ፋክስ: 127749; ዕ.ሰ.ቡ: 247

ተውዝዕ ጀሪደት:

ተለፎን: 163471-07588045

አትአመርት:

ተለፎን: 125013; ዕ.ሰ.ቡ: 1284

ሴረ ሰንወ ! !

የምክን፡ እት መስሐል አኽራን፡ አው ህዬ ሐላይ፡ ዑነ ዐንዶም ትዘልም ትገብእ። እትለ ማሌ ዛልምት ዐለት። ውዳይ ረቢ ክምሰል ፈታቱ!” እም ዝፋን እግለ ድሩቡብ ተኸለ ደብር እብ ዕንታተ ከለቱ። ዕንታተ ምን አትቃመቶትለ ደብር አስክዬ እት ገኒሐ ተበሰም ወዴት ወሐር፡ አፍህ እት ማትህ ጣዌቱ።

ክምሰል እሊ ህዬ ትቤ፡- “ወድ ሰንወ ክምሰል እሊ ትርእዩ ትደበረ መሰል እትኩ።

ዝፋን ህጅክ አተላሌት።

“ወድ ሰንወ ዝላም ረክበ ምንዲ ገብእ ንዩቱ ትፈትየ እግሉ። እብ ለውቀት ልሽዕር። ጸሓይ ኢፈቱ። መትከባሩ ነኡብዩ እግሉ ምንዲመ ገብእኩ መትቀባሻሹመ ኢለአሰኔ። ህቱ ሐቆ ፈርሐ ሕናመ ለውቀቱ ትሸምለ። ካልቅ አርወሐቱ እት ጀነት ቱ ለአነብረ። አብዕብዬ ምእት ሐል እንዴ አዶረ ሞተ። ወድ ሰንወ ወአብዕብዬ ገለግል እት እንቶም ዐለው።



ደአም ዮመቱ ብድሆሁተ! ግዩም ወዝላም ፈቱ።” ምን ቱ ገብእ ወድ ሰንወ”? ትሰአልኮ አናመ እብ ጀሆቼ። “ህቱ ኖሱ እሊ እት ቀደምክ ተክል።” እት ትብል አስክለ ታክየት ርሽመትለ እንበ ሴረ ሐበረየ እግልዬ አጫብዕለ እዴህ። ሰአል ተውዴሕ እት ሐዜ፡ ምን ሐብሬህ ግሁፍ እት አኑ፡ “እግል እንባሴረ ትብሊ ህሌኪ”? እቤለ። “ወድ ሰንወ እንብሉ” እምዬ

እብ ፍንቱይ እተ ናይ ደንጎበ ዕምሩ ሕሉልፋም መሳኒት፡ ወመትሃጅክት መታሊት እት እንቶም ዐለው። ህቱ እግል ኖሱ እግል አብዕብዬ ሰኒ ለሐሽሙ ዐለ። ክምሰል ኣደሚ እዘኩ እንዴ ቃፈራቱ ሰምዑ ለዐለ ተሰፋይ ወልዬ። እብ ክብር ረአሱ ለዐል ልትማጠጥ እት ህለ፡ እብ ረዶቱ ለአትዐግቡ ዐለ። ሸንን እት ህለ፡ ክምእኒ ናይ አዜ እብ ዲደት እግል

ልትፈንጅር ለሐዜ።”

“ክብር ወእንባሴረ ሚ ገብእ ለአትማጽኦም”? ተየል’ለ ቅሰት መርበዩ መትፈራግ እግልዬ አብ፡ ከለትሰአልኮ እቡ ሰአልቱ። አዜመ እም ዝፋን ድግመ ወሰከት ወአተላሌት።

“አብዕብዬ ለዳገመየ እግልነ ቅሰት ተ (ሐካኪቶ)።” “አብዕብዬ እብ ሰን ወክብር ወድ ሰንወ ደግም እግልነ ዐለ። ነኣይሸ እት ሕነ ክምሰል እለ ግላየትነ አዜ፡ እት በረንደት እት ሐንቴሁ ንትገሴ፡ ወአብዕብዬ ድግም ሲረት ወድ ሰንወ ረፍዐ ምንዲ ገብእ ክሉ ረአሱ ኢለአትካርም።” እግለ

ለለሐምርግ፡ ወእት ህላግ ለካሬ ለኢትጸበረዉ ምስትንክር ቴለል ህቱ ሳደፈ። ፈሽሐኒት ላቶም መክሉቅ ረቢ ክምሰል ከዋክብ ዳምቃም ውብዝሓም ወዐባዩ ለፈሮ መክሉቃት ህቶም እግል እሊ ጋድሞታት ሐየጠዉ። ምን ጀህት በሐር እንዴ መጽአው ወርሰዉ።

ምን ክትር ብዝሐሆም ምን ሽርቀት ፈጅር አስክ ላሊ ተዐይር እት ልትካረው እንዴ ኢለአተሞ አምሰው። ክምሰል ጊመት እግለ ሰመ ክም ኢትትርኤ ወደወ። ቀደም ጽብሕ ምድር ለአስተብደው ሐቆ ሰፍጥ አመቅረብ፡ እት ደንጎባሆም በጽሐው። ለምን ክሉም ለለዐቤ ለፈርር መክሉቅ ዝዜፍ እበ ደነብሩ ሰመ ሐቆለ ገልበቤ፡ እሊ ሸፍርነ እቱ እንዴ ልትካሬ አበርገነ እግልነ። አብዕብዶታትነ እብ ምጸአት ወመፋጅአት ናይለ አመቶም እንዴ ኢትትአመር ለዔረውነ ገሻታት፡ ሰኒ ፋጅኦም እት እንቶም እት ምንቀደም አብያቶም እንዴ ትጋሰው እብ መትፈካር ለአተቃቡሉም ወዐለው። ለምን ክሉም ለዐቤ ፈራይ መክሉቅ ምን ክሉ ለሽብሃት ዐድነ እንዴ ሐረ እቱ እብ መትከራዩ ዝያደት አትፈክረዮም ወአብህጃዮም።

እት ደንጎበ ህዬ፡ ምን መትሻቃል እንዴ ትፈንተው ሚ እግል ልደው ክምሰል ቱ ምሰል መክረው። እት ሰልፍ ክምሰል ነባሪሆም ወሰዋልፍ ገቢሎም ለአምሮምተ ሕድርኖት ጋሸ፡ እበዩ መጽአው?፡ ወምን አየ? ክምሰል ትበገሰው ወአየ እመማም ህለው እግል ለአምሮ፡ እግል ልትሰአሉም ነው። እብላ ህዬ ለምሰል ዓይር ለዐለ ጋሽ ለልትፋህሞ ዐባዩ ዐድ ትሐረው ውተዓረው፡ ከአስኮም ረትዐው።

ለትሐረው አንፋር ዐደዶም ሴዕ ነፈር እት ገብእ፡ እብ ዕምር ለዐበው ዐለው። እግል ሕድርኖት ማጽእ ለዐለ ጋሽ ሴዕ ብግዕት ትማጠጠዩ። አባጌዕ እት ኬዩ አስክለ ዐቢለ ጋሽ ክሩይ እቱ ለዐለ ጋድም ጌሰው። ሐቆ እደይ ትማጠው ለእግል ሕድርኖት እንዴ ቤለው ኬቡበን ለዐለው ድራር ጋሽ አባጌዕ ሰለመው። ሐቆ እለ ምነ ሕሩያም ለዐለው ዐባዩ ዐድ ዝያድ ክሉም አብዕብነ ሰበት ለዐቤ ዐለ፡ እግል ክሉም እንዴ ወከለ እግል ልትሃኒ አዜመ ለሕሩያም ለዐለው እግሉ ሐረው።

አስክ ዎሮት መልህዬ እት ብሩር ሰንዐ። ለነብር እት ንግደቶም (ሐውሊየት) ጋይሱ እንዴ ዐልኮ፡ እት አቀብል፡ እት እግር ገበዩ፡ አስክ ዐድ ዝፋን ገብራንገብ እግል አወልዋ ሰበት አመምኮ፡ ኪሎ ቡን ወኪሎ ሰከር ምሰልዬ ነስኦኩ። ሒን ከረም ሓልፍ ዐለ፡ ወቀይም አክል አሕድ አቲ የዐለ፡ ወሬሕ 10/2018 ቱ ለዐለ። ዐስተር እብ ዝላም እት ኢወቅተ እብ ደበኒት ተአጅኦምም እትነ ዐለት።

እት ዳንዴሮ ላሊ ሐቱ ትመዩኩ። አደይ ዝፋን ገብራንገብ ምን ዘውዴ አብርህ ክምሰል መጽአኮ ዶል ደገምኮ እግለ ለእተ ትከሬኒ ትቀዌት እተ። ክምሰል ዎሮት ኢዮዩ ህዬ ሰኒ ትሐደረትኒ። እብ ክሰሰ ወድ ሰንዐ። እግል አዳግመ ማጽእ ክምሰል ህሌኮ ህዬ የአሰአልኩው። “ሰንዐ። ማጽእ እንዴ ዐልኮ እት ገበዩ ክምሰል ትጠዌኮ” እተ ሌጠ ደገምኮ እግለ። እብ ክሰሰ ቅሰት ወድ ሰንዐ። ህዬ እብ ኖሰ እግል ትዳግመ እግልዬ ዳረክው።

ለህጅክክ ህዬ ክምእኒ ትትሸረሕ፡ ማሊ ምድር ቡን አፍለሐት እግልነ።

ቡን ፈልሐት። አነግር ጣፍ ዲቡ ሺሮ ጸብሐት እግልነ ከእግል ንትዐገል እተ ቀርበት። ዝፋን ጸጋይት ተ። ሒን መትወላድ ነቢ ዒሰ እብ ግብአቱ ምእምኒን ደያነት ክሰታን ጸም ሚላድ ጸይማም ምንዲ ኢለዐለ፡ነዊድ ግዕፋብ ወሐርደት እግልዬ። እተ ምሴት ለህ አርድ እብ ቀራረት ቅንጽት ወግላየት ካልእ ሰበት ዐለ፡ ህርፎት ሐሊብ ለመሰል ፎር (ጋቢ) አልበሰተኒ። ምን ረዩም እት ጀፈርነ ለዐለ አድብር እምባሴረ፡ እት ርሽመቱ ጊመት ጸላም ግልብብቱ እት እንተ ልትርኤ ዐለ። ዐስተር እብ ሀዳይድ ጀማጅም ሰበት ዐለት እምባሶይረ ምነ ቃሎተ ሀዱደ ለአርዐዴ ለህለ መሰል እትኩ። ለሀዱድ በርቅ ትሓበረዩ ምንዲ ገብእ ቀይሕ ሐብል እተ ደብር ልትጠብጠብ ለህለ እት መሰል ለተአፈርህ ክርን ከልቅ ዐለ።

“ለዐስተር፡ ዮም ዝላም ላሊ እግል ትውዴ ትመሰል” እቤ። ካኑን እግል ቡን እት ሸርፍ፡ ምሰል በህልዬ ኢዋፈቀት። “ላለ ድራርዬ! ዮመቱ ኢትዘልም እትነ። አምዕል ቀዳሚት ዛልምት እትነ ዐለት።” (እተየ ? ገብእ ትዘልም)” “እመር ኢኮን

እምሐጃር፡ እብ ውፋቅ ወኪር ትትሐደር

ሙሰውር፡ ክብርም ጸሃዩ

እቲ ለሐልፊ ወክድ አሰክ አቅሊም ጋሽብርክ ምዳርየት ገሉጅ እንዴ ተሐረክነ እዳረት ዳሕየት እምሐጃር ባጽሐም ዐልነ። ከሓድር ቴለላ እብ ከሰሰ ተውዲሕ እግል ለሀብነ አሰይድ ተሰፊኢለም ዐንዶም ቀለተ መስኡል ሽብህ መዲነት እምሐጃር ምስሉ እሙሕቡራም ዐልነ። ታምም ህድግነ ህዩ ዲብ እለ ናይ ዮም ጥብባብነ እግል ንቀድሙ እግልኩምቲ። ቅራኑት በኪተት።



አሰይድ ተሰፋኢለም ዓንዶም

እምሐጃር እብ ግብላት ምስል ደውለት ኡቶብዩ ሓመራ፡ እብ ምውዳቅ ጸሓይ ምስል ደውለት ሱዳን ሓመዳይት፡ እብ ምፍጋር ጸሓይ ምስል እዳረት ደዋሒ ቃጨር ወእብ ቅብለት ህዩ ምስል እዳረት ደዋሒ ገርገፍ ትትሓደድ። እምሐጃር መሓዝ ተክኪ እንዴ ሓደደዩ ለልሓልፍ ሽዕብ እብ ሐርሴር ዐቦ ወእብ ትጃረት ለልትናበር ቲ። እምሐጃር ዲብ ክልኤ እዳራት ዳሕየት ለትደየር ተ ዲብ እለ እደራት ደሕደት 9,495 እብ ትንፋሰ 2,258 ዓኢላት ህዩ ነብረ። እት ረአስ እሎም ሰነህ ህዩ 1500 ለገብእ አፍራድ እብ ለትፈናተ አሰባብ ምን ብዙሕ ባካት ኤረትርዮ እግል ሽቅል ወሐርስ ምስል ኡዳምም ወለትፈናተዩ ዓኢላት እንዴ ትጸገወው ለነብር ህለው። እት እምሐጃር ለህለ ሽዕብ ትፋድ ውፋቅ ወውሕደት እቡ ለልትአመር፡ እምበለ ቀውምየት ዐፈር ምን ክለን ቀውምየት ኤረትርዮ ለትጃመዓቲ።

እምሐጃር ምን እብ ሐርስ ከረም ማሼለ ወሰምስም ለልትጃቀፍ ምን አርድ ኤረትርዮተ። ዲብ እለ እዳረት እለ ህዩ አርድ ዲብ ሰነት 2017 ሸንሸነ ክም ገብእ እግሉ፡ እቡ ገደሰ ህለ። ናይ ሐረሰቶት ምልክየት ወናይ እጃር እንዴ ደፍዐው ለልሐርሶ ትጃር እንዴ ትበህለ ዲብ ክልኤ እንዴ ትከፈለ ልትሐረሰ።

ዮም ዓመት ለዐለት ሓለት ከረም እንዴ ተአከረት አሰብዴት፡ ምናተ ክም ጠቢዐት ሐርስ እምሐጃር ምን ወሬሕ ጃላይ ወሐር ሰበት ለዐሬ ወዲብ ወሬሕ ኣጎስት ህዩ ዝላም

እንዴ ጨቅጠት ሰበት ዘልመት ደሐን ገብእ። ምናተ ሐረሰቶት ስምስም ዲብ ወሬሕ ሰብተምበር ምን ዝላም ዲብ ልትሻቀሎ ምንም ጸንሐውነ እት ኣክር ላኪን ነቲጀት ሐርስ እምሐጃር ስምስሙ ወማሼላህ ሰኒ ክም ገብእ እግል ነኣክድ ቀደርነ።

ብዕድ ከዛን በደሚት ለልትበህል መ ዲብ እለን እዳራት እምሐጃር ለህላቲ። ከዲብ መንበር ወሐዶት ሰነን እምሐጃር ለአምጽአዩ ተቅይር፡ እለ ከዛን እለ ዲብ 2009 አሰብደ ወዲብ 2010 ተመ። ምስል ተመት ናይ እለ ከዛን እለ ምን ተሐቲ ለህለ አርድ እንዴ ትመድመደ ምን እግል ልግመል ኩለ ለልኣትሐዘ ብንየት ትሕትየት ሰበት ኢተመት ለማይ እንዴ ትክዘነ ነብር ህለ። ክም ስትራተጅየት ሕኩመት ህዩ ኣካት ሕራት ወምን ተሐቲ ለህለ አርድ ርሒብ ሰበትቲ ሙስተቅበል ለገንሕቲ። ለልኣፈርህ ህለ ምን ገብእ ህዩ ለከዛን ጨበል እግል ኢልምላእ መትሓፋዝ ወከዲም ለትሐዝዩ ህለ። መንፈዓቲ ህዩ አሰክ እለ ብዙሕ ኣንውየት ጋሽብርክ ማይ እግል ልሰቲ ምን ቃድር ህለ።

እምሐጃር እምበል ሐርስ ዝደድ ለትትአመር እቡ ተዋብ ንዋይ፡ ኣሐ፡ ዐጣል፡ አባግዕ ወእንጎቲ እለ ንዋይ እለ ህዩ ዮም ዓመት ሰኒ ጽጉብ ወርሹድ ህለ። ሰብኡ ረቢሆም እት ለሐምዶ እብ ሓለት ንዋዮም ርዩሓም ህለው። ዓፍየት ንዋዮም ህዩ ሕማም መ ምንመ ልትርኤ አጊድ ዲብ ምስሎም ለህለ ፈረዕ ውሳረት ሐርስ እንዴ ጌሰው መሻክል ንዋዮም ለአሰኦሎም ወደወ ወሐብሬ እንዴ ረክበው ለሳደፈዮም ሕማም ክም ልትሳሬ ውብዕድ ሕማም እንዴ ኢመጽእ ክም ደፍዕው እግል ልግብእ ለለአቀድሮም መኣሰሳት ሕኩመት ህለ እሎም።

እምሐጃር እት ሕዱድ ለህሌት ሽብህ መዲነት ሰበትቲ፡ ሕዱድ ዲብ መናበረት ሽዐብ ወአምን መንጠቀት ለልአመጽኡ ተቅይር እብ ገንሕ አሰይድ ተሰፊኢም፡ “እግል መንጠቀትነ ለረብሽ ኢመስኩመት አሰክ እለ ለትረኣ ብዙሕ ኢህላኒ፡ ምናተ ግሩም ህሌነ እንዴ እንቤ ሰነብ



እንዴ ኢገብእ ሽዐብ ባክ ሕዱድ ክም ህለ እንዴ ኣመረ እግል ለአንተብህ እንዴ ረክዘነ እንሸቄ እቲ ለህሌናቲ። መናበረት ናይ ሽዐብ ሕዱድ ገሌ እብ ተህራብ ለመጽእ በዳይዕ ልትርኤ እብ ገበይነ ላኪን ናይለ ለመጽእ በዳይዕ ነዳፊት ወዓፍየት ድምንት ሰበት ኢኮን፡ ትርድት መራቀብት እንወዴ እብሊ ለመጽእ በዳይዕ ሐድቲ። መናበረት ሽዐብ ህዩ ምን ሕዱድ እንዴ ኢገብእ ምን ሐርሱ ወንዋዩ እብ ለረክባቲ ሳይር ወልትናበር ለህለ።

ከደማት እጅትማዕየት ተዕሊም፡ ዓፍየት ማይ ውብዕድ ሚ መስል ህለ እት እምብል እግል መስኡል



ሽብህ መዲነት እምሐጃር አሰይድ ተሰፊኢለም ዐንዶም ክም ሰኣልናሁ፡ “ሲዮሰት ሕኩመት ኤረትርዮ አሰክ ብሩር ለትገንሕ ሰበትተ ክም ኩሉ ብሩር ናይ ኤረትርዮ እምሐጃር ዲብ ተዕሊም፡ ዓፍየት፡ ማይ ሕኩመት እንዴተረደት ትሸቄ እቲ ለህሌት ቲ። ዲብ እምሐጃር ህዩ ምር መርከዝ ዓፍየት እግል እለን ዳሕዶት ለገንሕ ክድመት ለልሃይብ ህለ፡ ዲብ ተዕሊምመ ሐቲ ናይ ምግባይ ወክልኣይ ደረጀት ወክልኤ ናይ መኣንብታይት መዳርስ ህለዩ። ዲብ እለ ሰነት እለ ህዩ እብ ፍንቲይ ዲብ ኩሉ ባካት ክምመ ገብእ ለህለ እብ ብዝሐ ረውዳት ናይ ክስተት በርናምጅ አዋምር እንዴ ትህየብ ክል እዳረት ደዋሒ ምን ፅምር 5 ሰነት ወተሐት ዲብ ሐን እዳረተ እግል ተኣድርስ ልትሸቄቡ ህለ።”

ከደማት ማይ ለከሰ ህዩ እለ እምሐጃር ክምመ ለእንቤሉ መሓዝ ተክኪ ለልሐልፋተ። እለ ዲብ እለ ሓድር ለህለ ሽዐብ ህዩ ማይ ካፊ ምንመ ህለ እለ፡ ነዲፍ ማይ እግል ልሰቲ ሰበት ወጅቡ እብ መስኡሊን ዐማር ማይ ክልኤ ዔለ እንዴ ተሐፈረየ ሽዐብ አሰክ ተክኪ እንዴ

ጌሰ ማይ ርሱሕ እግል ኢልሰቲ፡ ሰብ መቅደረቶም እንዴ ዝመው ከደማት ሰኒ ለህደቦ ህለው።

እምሐጃር ክም መስኩብ ወመሕደር ምን ትትአመር አዝቡን ዋድየት ህሌት። ዲብ እለ ለሐልፊቲ መራሕል ህዩ እብ ፍንቲይ ቀደም ሕርየት እምበል ሐድ መባኒ ናይ በዲር እግል ትጠወር ቃድረት ኢዐለትኒ እግልሚ አባይ ሽዕብ ወምድረ ክም ዔጳት ሰውረት ልርእዮም ሰበት ዐለ ምን ዶል እት ዶል ጀራይም እብ ዐላክር ወጠየራን ሳድፈ ጸንሐ። እብ ፍንቲይ ለትትአመር ህዩ ባንኪ ናይ ሐመረ ምን እምሐጃር እንዴ ትብገሰው

በዲር ሰበት ለአምሩ ራህየት ክም ለረከበት እብ ሐዲስ ክም በዲሩ ዲብ መስኩብ አቅብለ ወናበረቲ ዲብ ሳየርት ትፈረረ። ሰበት እለ እምሐጃር አባይ እግል ልደምረ ልትፈረር ወኩሉ ክም ወደ ዲብ ምን ሐዲስ እብ ምርወት ሻዕብ ወእህትማም ሕኩመት ተ ትጀደድ ወትትዐመር ምን ቅባል እት ልርእወ እምበል ንዮቶም ለአተቃቡለ ህለው።

ከደማት መዋሰላት፡ እትሳላት ወክህረበት፡ ሽብህ መዲነት እምሐጃር ዲብ መደት ከረም እብ ሰብብ ዝላም ገበዮም ሰበት ትከርብ ናይ መዋሰላት መሻክል ለበዝሐ ዲብ ወክድ ከረም ልትርኤ። እብ መኣሰሰት ሐራት ህዩ ዳይመት አተብሰ ሰበት ህሌት መሻክል ብነ ምንመ ልብሎ ምስል ብዕድ ባካት እንዴ እትራኤክ ላኪን መሻክሎም ለልትመረር ኢኮን። መንጠቀቶም እህትማም ሕኩመትመ ሰበት ገንሕ ወኣትቀባል ናይ ንኣይሸ ወዐባይ መካይን ሰበት ህለ ናይ ሐራት ምን ትሰኣን ወትትኣክር እብ እት መንጠቀቶም ለህለዩ መካይን እንዴ ተሐረከው ምን ቀረዶም ለከርዕ ክል ረአሱ ለልትማረር ሰኢን መዋሰላት ላቲ ጸብጦም ኢህለ። ከደማት ኤራቴል ብዙሕ ለኢደመነ እግል ኢልግባእ ለአፈረህክ እንዴኢኮን ናይ ክልኢቲ ድወል ከዋ ዲብ መንጠቀት በጽሕ፡ ሰበት እለ ናይ ተለፎናት ክድመት ደሐው ህለ። ከደማት ካህረበት ናይ ሶላር ድራሳት እንዴ ገብእ እግል ኩለ መዲነቶም እግል ለአብርህ ለቀድር ድራሳት እንዴ ገብእ እግል ልትሸቄ እሎም እብ አዮካይ ልታከው ህለው። ዲብላ ሸፍገ ወክድ እግል ልምጽኦም ህዩ ሕኩመቶም ልታከው ወልሰኡ።

እት ኣክር አሰይድ ተሰፊኢለም ዐንዶም መስኡል ሽብህ መዲነት እምሐጃር፡ “ሽዐብ እምሐጃር መንጠቀቶም መንጠቀት ሕዱድ ሰበት ቲ፡ ክልዶል ሰላም ምንመ ተህሌ እብ ግዋሬ ለመጽእ ለትፈናተ ጸብኢታት ለህሌ ወኢልህሌ እግል ልትሓፈዝ ወእብ እንትባህ ዐዱ እግል ልዕቀብ። ክም ካልኣይ ህዩ መንጠቀቶም ናይ ሐርስ ወርዕዮ መንጠቀት ሰበትተ ሽዐብ ምን ኣክዶራት መንጠቀቲ እግል ለአሰተፊድ እግል ልሕረስ ወልርዔ። እንገዋጋይ ዲብ ሱቅ ሐበት መንገፈዐት አለቡ፡ ለንሐዝዩ ማል ምን ንዋይነ ወሐርስነ እግል ንርከቡ ዲቡ ንረክዝ” ልብል።





መደርሰ ጅንጥ

ሓይሳም ቂርአት ርክን ምን ሰጅል፡ ምን እብ ሰበት ታሪክ ለትኩተብ ተጃርብ ጉዳል ሽዑብ ኤረትሮፕ ለሰላኤ ክታብ ደጀን፡ መሐመድሰዲድ ዑስማን ለክትብዩ ‘መደርሰ እንተ’ ለትብል ቅሰት እግል ዮም ሳልሳይ ክፈለ እግል ንርኤ፡

ደብር ብሮጀጊ ምን ሕግሰ አድብር ሮረ-ሐባብ አሰክ በቅለ ለልትመደድ ሐድ ክልኤ ሳዐት ለነሰእ ደበር ሻንን ቱ፡ ትዕብ ሰበት ዐልኮ ፍግረቱ ሰኒ ትደቀበት እቼ፡ 150 ለገብእ ጥለግ ወከላሺን እንዴ ተሆገልኮ እት ሄርር ሰር ናይለ ደብር ክምሰል በጽሐኮ ፍንቲት ክርን ሰምዐኩ፡ ነፍሼ ሽዐሊለት ዐርገተ፡ ለክርን ናይ ሚ ክምሰል ተ እግል አክድ እዘን ከፊት፡ክትር ጽልመት ምክራይ እግርክ ኢትአምር፡ ክርን ወዲ ለዐለ ሔዋን እግል ለአትአምረኒ ለሐዘ እት መሰል፡ “ብህም፡ ብህም” ቤለ፡ ሰኒ ክምሰል አተንሴክወ ህመም ክምሰል ቱ ሸክ ኢወዲ፡ እብ ገቤየት ቀጣን ሄርር ዐልኩ፡ ለገቤድ ድማ ክወድገለበ እሰ ሰበት ዐለ ምን ሐቀ ትሸልተፍክ ምክራይክ ጋድጥታት ጠህራ ቱ፡ ለብለቅ ሰበት ሸላትፍ እብ ቅሩትክ እንድኢኮን እግል ተአወልጥ ኢትቀድር፡ ለገቤድ ሐቲ ወህታመ ሰራጥ አልሙስተቂን ቱ፡

ለህመም ምን ዕጩት ዲብ ዕጩት እንዴ ልትሳረር ወአቅሹን እንዴ ሻሌዕ ሸንክቼ ትከረ፡ ከላሺንዬ ዕምርት ሰበት ዐለት እብ ቅሩቼ እግል እማኩት እንዴ ፈትሐኮ በጠርኩ፡ ዲብ ቀበትለ ጽልመት ለህመም ሕልወይ ክምሰል ቱ እግል እፈርግ ቀደርኩ፡ክርንቱ እንዴ ወቀለ አቅሹን ዕጩይ እንዴ ሻሌዕ ወላክፍ ዲብ ረአሰለ እት ምግብለ ገቤድ ለዐለት ዕጩት ትገሰ፡ “ነዐ እናስ ግበኤ፡ ሸት እብለ ገቤድ ተሐልፍ፡” ልብል ለህለ እት መሰል ነወ እግልዬ፡

ከብጃ ትብጭበጨት ወገሮብዬ ማይ ትከዐ ዲብ፡ ሚ ክምሰል እወድዩ በደ ምንዬ፡ ጥለግ ካፊ ወከላሺን ምንመ ዐለ እግልዬ፡ እንዴ ለከፍኮ ሐቀ ጀሌኮ ስጋጃ እግል ጨውጩ ክምሰል ቀድር ትርኤኒ፡ ዲብ በር ሰበት ዐቤኮ እብ ክሰስ ሸፋገት ወጀኣረት ወነን ዋልዲንዬ ለአትሃጅኩኒቱ ለዐለው ቅሰሰ ኢትረሰዘክወ፡ አማን ተሐይሰ ሰኒ ፈርሆኩ፡ ዲብ ሐያቼ ክምሰል አምዕል ለህ ፋርህ ይአምር፡ ገሮብዬ አርዐደ ወጭገርዬ ብጣሩ ለገብእ መሰለ ዲብዬ፡

“እግልሚ ትፈርህ ህሌክ? ህመም እብ ከላሺንክ ሚ እግል ልውዴክ? እንዴ ፈጠንክ ልከፍ ዲብ፡” እት ልብል ደሚርዬ አማውር ሀቤኒ፡ እግል ከላሺን እብ ቅሩቼ ሸንክትለ ህመም

እግል አማንሐ ፈከርኩ፡ “ሃያእ! ምን እጀሌ ህዬ? ሕጅት እለክፍ ዲብ ገጽ ግረ ምን አቀብል ለሐይሰኒ፡ አሰርዬ ምን ገብእ ህዬ?” ኖሼ እትሰኣል ወእበልሰ፡ ምን ለዐል ክሉ ለአትሻቀሌኒ ላተ ለጀዋብ ቱ፡ “መንኣመረ ሐቀ ጀሌኮ ለህመም እግል ልቅተለኒ ቱ፡ ለጀዋብ ህዬ እግል ልብዱቱ፡ ጀዋብ ተንዚምዬ እግል ትከሰሰ ጀህት ሐቀ ኢበጽሐ ከሳረት ቱ፡” እቤ እብ ፈርህት ዲብ እትብጭበጭ፡ ለህመም ላኪን ትም ኢወደ፡ አክለ ሀነ “ህም፡ ህም! ወህ” እት ልብል እግል አቅሹን ናይለ ዕጩት እንዴ ሻሌዕ ገረድም ወድዩ ዐለ፡ አሰክዬ ሐቀ ኢሰረ እግል ይእልክፍ ዲብ ምሰል ነፍሼ ገማኒ፡ ዲብ ለዐልኮ እተ አካን አሰክ ምድር እቤሕ



መሐመድሰዲድ ዑስማን ምን ድማን አወላይ ምሰል ደረሰ ማርዩ

እግል እትጸበር ቀረርኩ፡ ምናተ፡ ለህመም ለፈርሆክወ ገብእ መሰለ ዲብ ምን ለዐለ ዲብ ዕጩት እንዴ ሰረ ዲብ በልቀት ዐባይ ትገሰ፡ ለበልቀት ምንለዐልዬ ሰበት ዐለት እተ ጽልመት ለህ እንዴ ፈጠንክ እግል እልክፍ ዲብ ለበክት ሰኒ ጨቢብ ዐለ፡

“ለጀሬት ትጅሬ እግል እልክፍ ዲብ ቱ፡” እንዴ እቤ ለከላሺን ሸንክቱ አግካክወ፡ ለህመም ሐረከቼ ክምሰል ረአ እግል ትብረር ለትዳሌት ጥያረት እት መሰል እግል ልሰረር ዲብዬ ትዳለ፡ ትንፋሼ ሸፍግ ሰበት ዐለ፡ ለከላሺን እንዴ ሰበት እግል እጽበጠ ኢቀደርኩ፡ ምንመ እልክፍ እግል እቅተሉ ክምሰል ይእቀድር አክልሕድ ተአከደ እግልዬ፡ ዲብ ክእነ ቴለል

እት ህሌኮ አብዕብዬ ለዳገመዩ እግልዬ ቅሰት ሰበት ትዘክርኩ፡ “ዎ በዐል ክልብ! ህመም እንሰር ህለ፡ እብለ ነዐ፡ እብለ፡ ሸንክት ተሐት ትከሬ፡ እብ ሸፋግ ትከሬ፡ እንሰር ህለ፡” ዲብ እብል ጨጭ ወዲ፡ ለሳሳት ቃሎት እንዴ ወደ ምድር ዲብ ሕድ ጨንገር ቤለ፡ እለ ዶል እለ ለህመም ድማን ወድገለብ እት ልትዋለብ ዐንበልበለ፡ ምን በልቀት እንዴ ነጥረ ሸንክትለ ሳሰት ክባባይ ገብኤ፡ አነ ህዬ ሰኒ ወአማን ጨጭ እቤ፡ ለሳሳት ክሉ ቃሎት ሰበት ወደ አርድ ምን አክራናት ትመልኤ፡ ለህመም እብ ክርን ሰበት ትረበሽ እንዴ ልትፊተት ምድር ሐድገ፡

“ሹክረን አብዕቦ፡ ረቢ ጀነት ወረሕመት ለሀበኩ፡” እቤ እግል እብ ጋድም ዳብጠ ለዐልኮ ከላሺን ሸንክት መርኩብዩ እንዴ እበልሰ፡ ንኡሽ ዲብ አነ

ኢክትቦ “ክቡታምክ ህሌኑ” እንዴ ቤለው ሳርሐወኒ፡ ዲብ በቅለ ሐቲ አምዕል ክምሰል ዓረፍኮ እብ ለመጽኣክወ ገበይ እግል አቅብል ሄራርዬ አተላሌኩ፡ ዲብ እቅባለቼ ለገብኣት ምሽክለት እንዴ ኢትሳደፈኒ እብ ሰላመቼ ዲብ ማርዩ-ጸላም አቅበልኩ፡

ምን ነቅፈ ክምሰል አቅበልኩ፡ ዲብ ፍንጠረሬ እማት እግል አድርሰ አንበትኩ፡ ምን ገጽ-ፈጅር ምሰል ደረሰ ቤት-ምህሮ ቦርዲን እት እደርሰ ሐቀ አዝህር ለእማት አድረሱት አተላሌኩ፡ ገቢል ማርዩ ሰኒ ርሐም፡ ጸጋይ ወፊትያይ ምሕርበት ዐለ፡ እማት ማርዩ ክምሰል መደርሰን እንዴ ኢገብእ ክምሰል ውላደን ትከበተያኒ፡ አናመ ክምሰል እማቼ ወሐዋቼ እንዴ ትከበትክወን እብ ክሉ ልብዬ አደርሰን ዐልኩ፡ “ለተአምረ ሌጠ አድርሱ፡” ለትብል ህግዩ

ገብእ ጣውለት፡ ፈሐም እንዴ ለበጥኩሙ እግል ትትነፍዖ እቡቱ፡

“ጠባሺር ህዬ?” ምን እንቤ፡ “ደረሸኸ ጸዓዲ ትትነፍዖ፡” “ከራሪሰ ህዬ ቦም ማሚ?” “ረክበው ምን ገብእ ሰኒ ሰኔት፡ ሐቀ አለቦም ህዬ ትባሰር፡”

ክሉ እግል ምህሮ ለልኣትሐዜ ጋራት ምኒን ወእብኒ ክምሰል ቱ እንዴ ደረሰኒ እግል ሸቅል ብጉሳም ዐልኩ፡ ምሰል ደረሰናሁ እንዴ አትመጣወርኮ ለቴለል ዲብ ማርዩ ለሐሰ ዐለ፡ እተ ወቅት ለህይ ሰባር ጣውለት ወወረቀት ሐሊብ ረኪብ በክት ዐቢቱ፡ ሰበቡ ህዬ ለዲብ ግረ አባይ ለትወዘዐው ሰነ ዲብ ምን መዳይን ሰኒ ረዩም ላቱ ምድር ለአደርሶ ሰበት ዐለው፡ እብ ክምሰል ደረሰናሁ አግቡይ ኖሶም ባሰሮ ዐለው፡ እለ ሌጠ እንዴ ኢገብእ አባይ አምዕል ወላሊ እንዴ ልትነዐዮም እት ልትሓረቦ ወእስትሸሃድ እንዴ ደፍዖ ለአደርሶ ዐለው፡ ጀላብ ምህሮ ህዬ ብዝሓም ፍራስ ፍዘ ገብአው፡

አደርሰን ለዐልኮ እማት ዐሽም ምህሮ ምንመ ዐለ እግልን፡ ካፊ አላት ምህሮ ሰበት ይዐለ፡ ክምሰል ለአትሐዜ እግል አፍህመን እቀድር ይዐልኩ፡ እግል አላት ምህሮ ለሰዲኒ ሓጃት እግል አዳሌ እባሰር፡ ምናተ፡ ይእረክብ፡ እተ ወቅት ለህይ ‘ቻርትሰ’ ይዐለ፡ ሕብር አው ቻርትል ኢልትረከብ፡ ጠባሺርመ ክምሰል ምራድክ ኢትረክብ፡

ክልኤ ሐበት ጠባሺር እግል ሳምን ልትሆነክ፡ ለእማት ላኪን እግል ክሉ መጋዴዕ ኖሰን ለአርህያሁ ዐለዩ፡ ደለ ደርሰያህ ሐርፍ አው ዕልብ እብ ከዐሌ፡ ዕጩይ፡ ከላት ወብዕድ እሉ ለመሰል ሓጃት እንዴ ሸቀዩ ለአዳልያህ፡ እብለ ትፈናተ አሸካል ለሸቀያሁ ሕሩፋት ዲብ ቀበትለ ፈሰል እንዴ አተህንጦጠልናሁ ክምሰል አላት ምህሮ ንትነፈዕ እቡ ዐልኩ፡ ለፈሰል ዲብ ከደን ሰበት ዐለ ዶል ልትፈደሰ ለሓጃት እንዴ ነሰኢያሁ አሰክ አብያተን ገይሰ እቡ ዐለዩ፡ መደርሰን ምህሮ እግል ዐባዩ ክሉ ለሳድፈኒ መታክል ምሰል እንዴ ገማኒ እንባልሐ ዐልኩ፡ ተጅሪበት ለቦም እግል ሐዳይሰ እንዴ ሰዱ ወለአፍህዋ ወራታት ነአተላሌ፡ እብ ክእነ ዲብ መንጠቀት ማርዩ-ጸላም ብዝሓት መራክዝ ምህሮ ዐባዩ እንዴ ትፈትሐ ወራታቱ ለአትጋይሰ ዐለ፡ ምህሮ ነኣይሸ ላተ እብ ንዝምት ገቤድ ዲብለ ትፈናተ አካናት ለአተላሌ ዐለ፡

ስከሪ እት ክሉ ኡዳም፡ እት ክሉ ዕምር ለልትረኤ ሕማም ቲ። ለትፈናተ ኡጅናስ ስከሪ ሀሉ፡ ስከሪ ምን ኑዕ 2 ለልሙድ ጅንሰ ሕማም ቲ። እግል ክል ኑዕ ለትፈናተ ናይ ዕላጅ ስትራቲጂ ሀሉ። ክሉ እንዲ አመቅረሕክ እት ሳረዮት ወክሬዕ አውቁክ ምንገብኻ ሀይ ለእበ ሕማም ትመጽእ ከሳር ሰኒ ትውሕድ።

ስከሪ ሚቲ፤

ስከሪ ቅያስ ደም እት ስከር ሰኒ ዶል ልትረፈዕ ለጀሬ ቴሌል ዓፍዮት ቲ። ባክ ከርሽትን ለሀሌት ቀበት (pancreas) ለትበሀል ቅደት ሴላትን ለጠልቡ ስከር እት ሴላት ክም ለኣቲ ለወዲ ኢንሱሊን ለልትበሀል ጅንሰ ሆርሞን(ሰጠዋ) ዶል ልውሕድ፡ በታተን ዶል ኢሊሀሌ አውመ ለኢንሱሊን እት ሀሉ ገሮብን እት መዓሉ እግል ለአውዕሉ ዶል ኢቀድር ሕማም ስከሪ ረክበኝ፡ ለበዜሕ ጅንሰ ስከሪ ኔብራይ -አስክ ሀሌን ለጸኔሕ ምስልናቲ። ደኣም ሀይ መቅርሐ ሐቆ ቀደርኩ፡ ስርዐት መንበርክ ሐቆ አርተዕክ እንዲ ኢትመስክን ወምን ሽቅል ኢትዋጠል ሰኒ እግል ትንበር ምስሉ ለልትቀደር ቲ።

ስከር (ግሉቱዝ) ምን እሉ እንበሌዕ ወእንሰቲ ካርቦሃይድሬታት እንረክቡ። ሴላትን ሐሊት ወሐፋነት እግል ልርኩብ ሀይ ስከር ለሐዜ። ከስከር እት ሴላት በደል ለኣቲ እት አሰራር ደም ደውር ሀሉ ምንገብኻ እት ሴላት ለለኣቲ እቡ መፍቴሕ ራክብ ኢሀሉ። ለመፍትሐ ሀይ ኢንሱሊን ለልትበሀል ሆርሞን ቲ። ሀቲ ሐድ፡ ኢሀሉ አውመ ገሮብ እብ ገበዩ ሐቆ ኢትነፈዕ እቡ ለስከር እት አሰራር ደም እምበል ጋር ወስልሐት ደውር። እሊ ሀይ ብዝሐ ስከር እት ደም (hyperglycemia) እንብሉ።

እሊ ቅያስ እሊ እንዲ ኢልትዕደል ወክድ ረዩም ሐኦ ነስኦ ሕማም ልብ፡ ከላዊ፡ ዕንትት፡ ደማር ዓሳብ እንዲ ሰብብ እግል ለአመስክን አውመ አስክ ሞት እግል ለኣብጼሕ ቀድር።

ኡጅናስ ስከሪ

ለትፈናተ ኡጅናስ ስከሪ ምንመ ሀሉ ለእብ ብዝሐ ልትረኤ ላቲ ሰለሰ ቲ። ኑዕ 1፡ ኑዕ 2 ወስከሪ ዕምስነ

ኑዕ 2 (Type 2 diabetes) ለቡ ኡዳም ገሮቡ ኢንሱሊን ካሬ ነዜሕ ኢሀለ አውመ ለገሮብ እት መዓሉ ለአውዕሉ ኢሀሉ። ሐትሐቲ ዶል እት ነኣይሽመ ለልትረኤ ምንማቲ ለበዜሕ አውካድ እግል ዐባዩ ረክብ። ለሕማም አክል ሕድ እንዲ ኢልገዘር እት አናባቲ ለኡዳም አሻይር ሕማም እንዲ ኢልትሰምዖ እብ ገሌ ምስምስ ደሙ ክም ልትቀየስ ስከር ዛይድ እቲ ጸኔሕ።

ኑዕ 1 ስከሪ (Type 1 diabetes) እብሊ ኢተአመረ ሰብብ ለናይ መዳፈዕት ስርዐት

ነቢር ምስል ስከሪ

ገሮብን immune system እግል ኢንሱሊን ለሰኔዕ ሴላት እብ ኖሱ ደምኖ። ሐድ 10 ምእታይት ምን ምስል ስከሪ ለነብሮ እሊ ኑዕ እሊ ለብእቶም ቶም። ለበዜሕ አውካድ እት ኡጅኒት ወሽባብ ለልትረኤ ምንማቲ እትለ ገብኦ ዕምርመ እግል ልርኩብ ቀድር።

ስከሪ ዕምስነ (Gestational diabetes) እሊ ጅንሰ ስከሪ እሊ እት ገሌ ዐመሲ ልዝሀር ወክም ወልደየ ለሐድገን። ምናተ እት ዕምስናህ ስከሪ ለትረኤ ዲበ ወላዲት ምስል እያም ስከሪ ኑዕ 2 እግል ልትረቤ ዲበ ቅልዕት ቲ።

እንትሻር

ስከሪ ሕማም ልሙድ ቲ። እት ዐለም ሐድ 537 ሚልዮን ሰነት ኡዳም ለበጽሐው ኦንፋር ስከሪ ብእቶም። እብ ኦሳስ እሊ፡ ሐድ 10 ምእታይት ምን ሽዑብ ዐለም ምስል ስከሪ ነብር። እብ ጌማም ሰብ ምህነት ዓፍዮት፡ እሊ ዕልብ እሊ አስክ 2030፡ እት 643 ወኣክ 2045 እት 783 ሚልዮን እግል ልዕቤ ቲ። ዲብ ኤረትሮየ ሀይ 30796 ሰጁላም



ሐማይም ሀለው፡ ሕማምም እንዲ ኢደሉ ምስል ሕማም ነብሮ ለሀለው (ስከር ደምም ምን ቅያሱ ለኣልፍ) ዝያድ ምእት አልፍ ልትጌመሞ።

አሻይር

ለአግደ አሻይር ጽሚእ ወነሻፍ አፍ መትሐሻክ (ኦጊድ ኦጊድ- ሽዩን) መትጣዮፍ ዕንታት ሰበቡ ለኢልትፈረግ እክ ህማር (ሽለሕ)

ቀሲን እገር አው እደይ ድንግር ሐዮት ጸሌዕ (ምሽንዳብ) ለለኣትቀባብል ረክሰ ቀርቡት አው ኣማስ እብ ዓመት ዲብ ክሉ ኡንዋዕ ስከሪ ለልትረኤ አሻይር ቲ። እብ ኡንዋዕ ምን እንርእዩ ሀይ ኑዕ

1 አሻይሩ ኦጊድ እንዲ ዘሀረ ለእብ ሰብብ ስከሪ ትመጽእ ለተሐባለኩት አከይ ዓፍዮት ኦጊድ ተኣነብት። ለሻፍገት ደም እብ ኡሲድ ክም ትሰመመ ለለኣርኤ ክም ጠርሽ፡ መጸጸት ክብድ፡ ጸነ ፈዋኪህ ለበ ትንፋስ ወዴግ ትንፋስ ሐቆ ትረኦ እቲ ሕሙም ራድኢት ሻፍገት ናይ ሐኪም ኢረክበ ምንገብኻ እግል አርወሐቲ ብቆት ቲ።


ኑዕ 2 ሀይ ለገብኦ ሕማም እንዲ ኢልትሰመዕክ እግል ልእዜክ ቀድር። እብሊቲ ዕምር አክለ ወሰክክ መርመራታት እግል ቲዲ ወቅያስ ስከር እት ደምክ እግል ተኣምር ለልትመከር። እት ሰልፍ ዲብ ለኣነብት ገሌ ክፋላት ገኖበትን ኢንቡር ጽልም እግል ለኣርኤ ሰበት ቀድር እት ገሮብን ለእንርእዩ ተቅዩር ኢንህመሉ።

ስከሪ ዕምስነ፡ እሊመ ነፍስ እንዲ ኢትሽዕር እቡ እግል ልእዜ ለቀድር ቲ። ክል ዐምሳት እት ሳቤዕ ወሳምን ወርሐ መርመረ ስከር እት ደም ወዴት ምንገብኻ ላኪን እብ መርመረ እግል ልትፈረግ ቀድር።

አሰባብ

ከህላት ድድ ኢንሱሊ Insulin resistance፡ ኑዕ 2 ስከሪ ሴላት እግል ኢንሱሊን ምን ከሀለዎ በሀለት ከርክሐም ወኢሰምዕዉ ዶል ገብኦ ለመጽእ ቲ። ገሌ ምን ክእነ ደረጀት ለለኣበጹሕ ሀይ አክረሾት፡ ግሳይ- ኢሀለዮት ሐረከት፡ ጅንሰ ነብሪ፡ መትሐምራግ ሚዛን ሆርሞናት፡ ክልቀት ወገሌ አድውየት።

ሕማም መናዕት (Autoimmune disease) ኑዕ 1 ስከሪ ስርዐት መዳፈዕት ገሮብ(መናዕት) እግል እት ቀበት ለሀሉ ኢንሱሊን ለሰኔዕ ሴላት ዶል ተኡደምዑ ለጀሬቲ። መትሐምራግ ሚዛን ሆርሞናት (Hormonal imbalances) ዶል ዕምስነ ለእም (placenta) ከህላት ኢንሱሊን ለሰብብ ሆርሞናት



ትነዜሕ። ቀበት እግል ከህላት ኢንሱሊን እንዲ ዜደ ለልሐልፍ ቅያስ ኢንሱሊን እግል ትንዝሕ ኢቀድረት ምንገብኻ ስከር እት ደም በዜሕ።

መትደመዕ ቀበት (Pancreatic damage) እብሊ ገብኦት ብቆት አው ዐመልዮት ቀበት ትደመዕት ምንገብኻ እት እሉ ተኡፈሬ ቅያስ ኢንሱሊን ተእሲር እግል ለሀሌ ቀድር።

ኬቶን ለልትበሀል ሽይ እንዲ ሰንዐ ደምን እብ ኡሲድ ልትሰመም ወለሕሙም እት ቅያብ ገብኦ እሊ ሻፍገት ራድኢት ሐኪም ጠልብ።

ቅያስ ሽከር እት ደም ሰኒ ዶል ልውሕድ ዕንታት ልትጣዩ፡ ነፍስ ትጀላገዕ፡ ሕሙም እትሚ ሀሉ ኢፈዋን፡ ረጅፍ፡ ወእት ቅያብ ለኣቲ፡ እትላ ኢነት እሊ ኦጊድ እንዲ ትረደኦ ስከር ኢረክበ ምን ገብኦ አስክ ሞትመ እግል ልብጸሕ ቀድር። እሊ ዝያድ እት እበር ኢንሱሊን ለነሱ ነብራሆም እት ወክዱ ሐቆ ኢነስአው ለሳድፍ ቲ።

እት ወክድ ረዩም

ለመጽእ

ሕማማት ልብ ወኣስራር፡ ጀልጠት ልብ ጀልጠት ዓመት ድዕፍ ዓሳብ፡ ከላዊ፡ ዕንታት፡ አዘን፡ አከይ ዓፍዮት እገር፡ ቀርቡትአፍ ወዓሳር

ደወ

ስከሪ እግል ዲመ ለተሐዩ ምኑ ሕማም እንዲ ኢንብኦ፡ ቅያስ ስከር እት ደም እት ዋጅብ ሐዱ እንዲ ጸበዋክ ክም ለገብኦ ኡዳም እግል ትንበር ምስሉ ለትቀድር ሕማምቲ። ክል ኑዕ ሀይ ናይ ደወ ወመራዐየት ሰበት ቡ ለሐኪም ለሀቡ መምሬሕ እንዲ ኢተኣዘይድ ወኢተኣነሱ እት ኦኣመል እግል ልውዕል ሀሌት እሉ።

ዓፍዮት

ምን አክረሾት መትደጋግ ሚዛን ገሮብን ምስል ብጥረትን እግል ልትመሳኔ እት ብትክት ገሮብን እግል ነኣፍዝ ብነ።

ግሳይ እግል እነስኦ ነብረ እት ገሮብን እግል ኢቲጊስ ሰበት ለኣኣንቅፈ ክል ዶል እት ሐረከት እግል ነሀሌ ብነ። ሽቅልን ናይ ግሳይ ሐቆ ገብኦ ምን ነሐምቅ እት ምዕል ሰር ሰዕት እብ እገር እግል ኒጊስ ብነ።

ስከር ወሽቤሕ ለበዜሕ ዲቡ ነበሪት ወስተይ፡ ንትራዩሙ፡ ቅርጡዋ፡ ሐምሌ ወፈዋኪህ ናይ ክል ምዕል ሽርፍን ኒደዩ፡ ምን ከምረት፡ ትምባክ ወሰጃይር ሀይ ንትሐረም።

እግል ነፍስክ ወክድ እንዲ ሀብናህ ዶልክ ኣለት ዓፍዮትን ንድሉ።

ተጸሐፊው ሐይቅ ፈናን በረከት መንግሥት አብ

በረከት መንግሥት አብ፡ ምን አቡሁ መንግሥት አብ ባይሩ ወጸው አሰይደ አበባ ደባስ እት የም 21 ኖቨምበር 1936 እት ሀዘጋ ትወለደ። አቡሁ ሐረስታይ ፅጹም ሰበት ዐሉ። መደት ንጸሹ እት ሐርስ ወርዕዮ እት ለሐልፈ። አስክ 2ይ ፊስል ዲብ ዐዱ ደርሱ። እት ንጸሸንቱ እስልፍ ሕግን ተወለደ። እት ሐርስ ወርዕዮ እት ልትከስእ ዲብ ኢት ህዩ። በረከት ሕግን ፈንቱ ምኑ ኢትብረ። ሐቀህ እምብልታ ወመሰንቀ እግል ለአምር ረቅቡ። እግል ሰልፍ ለረአየ ክራር (መሰንቀ) እት ከያሉ አተየ። መረዋ። መደራግፍ ወአላት ሐርስ ጸርብ ሰበት ዐሉ። አምዕል ሐቱ ክሉ ከፈፍል ናይለ መሰንቀ እንዴ ጸርቦዩ አስክ ቤቱ ዓረ እቡ። እብ ለአበረ ሐጸይን መጭሐር እሳት። ግድር ዋልዳይቱ። ምን አብዕቡ ለነሰአየ ቀርቡት ወምን እት ባኩቶም ደህብ ተሐፍር ለዐለት ሸርከት ዋልዳን ህዩ አሰላክ እንዴ ሐየቡ። ለሰልፋይት መሰንቀሁ ሸቀ ከተወበዩ።

መንደላይ ክም ገአ። እት ጎይላታት አዋራፋ ሻርክ ዐሉ። መተንሰይፍ ፈዳብ ሰበት ዐሉ። ልብ እንዴ ከረ ለልትበህል ወለልትሐሌ ክሉ ጸብዋ ዐሉ። አቡቱ ክል-ዶል አድጋማት ትብል እሉ ሰበት ዐለት። እት ዓዳት ወተጸሪክ ገቢሉ ሕሰር ወአምር ዛይድ እግል ልርከብ ሰደዩ። እብ ፍንቱይ ድግም ፍርስት-ሐርብ ወምሰለ ለገይሰ ሐልየት ሰኒ ልትሐሰር ዲቡ ነብረ። “አሸፍር ቀዳምያም፡ ለኢትሐምረንት ህግዩ ብእቱ” ልብል ዐለ ብረከት!

በረከት ክራር ወሕግን ቀድረ። ሐልየት ነባሪ ምድሩ እግል ልሕሌ ዶል አንበተ ላኪን ዋልዴኑ ኢረደዉ እሉ። ምሰል ዋልዴኑ እት መፋረደት ክም አተ። ወድ 21 ሰነት ዶል ገአ አስመረ እንዴ አተ። እብ ዐለት እሉ ቅድረት ጸራብ ዕጩይ። እት መደበር ምን ሰነት 1957 አስክ 1958 ክልኤ ሰነት ክም ነጃር ሸቀ። ምን 1959 አስክ 1961 ህዩ ክም ሐ'ላግ ለሸቀየን ሰለሰ ሰነት ተን። ምን ልብ ለከረ ዲብ መሰንቀ ላኪን ይሓረመ።

“ለምህንት ምሰልዬ ለትክለቀት ተ። ምን ወድ 13፡ 14 ወ15 ሰነት ለገአኑ እቱ ወክድ። ሓጃት ፍንቱይ እወዴ ክም ዐልኩ። ወገሌ አንፋር ለሸቅልዬ ለዐጅቦም ክም ዐለ ሐራ ትፈህሚ። ምናተ ዋልዴንዬ፡ ዋጣይ፡ ዕዩን፡ ሰክራን ወጃህል እግል ትግበእ ሐዘክ?” ዲብ ልብሉ ልትባጠሩኒ ዐለው። ምናተ አዳም እለ ቤለ ምንመ ቤሉ አነ ላተ ምን ምራጄ ቢታተን ኢሸከፍኩ” ልብል በረከት።

እት አስመረ ብዞሕ ኢከልአ። እት ሰነት 1961 ድራሰቱ እግል ለአተላላ ወምን ጨቅዋ ዋልዴኑ እንዴ አረመ ምራዱ ጀላብ እግል

ሊዴ። አስክል ዲብ አዲስ አበባ ለዐለ ሐሁ ምዕባዩ ለጅአ። ዲብ አዲስ ህዩ። እግል እት አስመረ ለአንበተየ ምህንት ሕላገት እት ሸቄ ወምን ገጽ ምሴ ዲብ ደርሱ። አስክ ሳምናይ ፊስል በጽሐ።

አምዕል ሐቱ። አተ አካነትለ ሕላገት ተክሌ (ኮኛ) ለልቡሉ እርትሪ መጽአ። በረከት እት ለሐል'ጉ። እብ ፋጸ ለሐሌ ሰምዐዩ። ክም አትመመ ህዩ። “ሻሂ እግል አስቱክ” እንዴ ቤለዩ አስክ ገሀወት ሐቱ አተ እቡ። እት ለአተው ዲብ ገሀወት መሰንቀ ሰቅልት ዐለት። በረከት ህዩ። “አሕ። እለ መሰንቀ!” ቤሉ።

ኮኛ፡ “ትቀድረ” ትሰአለዩ እት ልትወጅብ። “አቤ” ክም ቤለዩ፡ ቀንጸ ወለመሰንቀ እንዴ ከረየ እግል ልሕሌ እሉም መጠዩ ተ። በረከት እብ ሸቦር ዛይድ ሕላይ ክም አስመዐዮም፡ “እንተ ሕላገት ሸቅልክ ኢትን” እንዴ ቤለዩ፡ ፈጅራተ እት ዲብ አቶብዩ እምር ለዐለት ለዐቤት ፍርቀት ትያትሮ ቀዳማይ ሀይሌሰላሴ ክም ለአቱ ወደዩ።

እስልፍ ናይ ከረ አቶብርሃን ሰጊድ ወኢብራሂም ማሕመድ ሐልየት እት ደግሞ አንበተ። ሐቀህ ላኪን ሐልየት ኖሱ እግል ለአፍግር አስተብደ። ምሰል እለ መጀመሪት ትያትር እግል 13 ሰነት እት ሸቀ ዲብ መደት። አስክ ለትፈናተየ ድወል ክም ኬንያ፡ ኡጋንዳ፡ ሰኔጋል፡ ሜክሲኮ፡ ወብዕድ እብ ሸቅል ሳፈረ ወቅድረቱ ጠወረ። እት መደት ለሀ፡ “ፍሊፕስ” ለትብህል ዲሰክ ለትጠቤዕ መአሰሰት ዐባይ። ሴዕ ምን ሐልየቱ ጠብዐት እሉ ወእበን ተአመረ። መአሰሰት ‘ፍሊፕስ’፡ እግል በረከት ሰን ሐልየቱ ወከብቱሁ እት ሸቦብ ክም ረኤት። እት ሰነት 1975፡ ለሐሰት ናይ ክልኤት ኮከብ ርትብት ፈን ሀበቱ። ሐልየቱ እት ሬድዮ አቶብዩ፡ ወምን ገጽ ሐር ህዩ። እት ሬድዮ መንደፈረ ወአስመረ ክም ትሰመዐ ግድም፡ ሰሜቱ ትወቀለት።

በረከት፡ ዲብ ፍርቀት ትያትሮ ሀይሌሰላሴ ተጅርቡቱ ክም ዐ'ከት፡ “መቻልሕ ጓይላ” ለትሰሜት እብ ኤረትርዩን ለቁመት ፍርቀት እንዴ አሰሰ። ምሰል ውላድ ዐዱ ዓዳት ወጠኑ እግል ልጠውር ተዐንደቀ። እት መደት ለሃቱ ህዩ ለእመራት ክም “ሩባ ሩባ ታሕቲ፡ ለሚነይ፡ ዕንበባ ዓደይ፡ መለይ፡ ወሰን፡ ደሃይ፡ ሚለና፡ ንበይነይ ኮይነ፡ አሞራ ‘ተዘኸውን’ዩ፡ ከዊልዋ ግመ፡ . . .” ለልብለ እት አልባብ ሴምዐት አካን እንዴ ጸብጠዩ፡ ኤረትርዩን ሸባብ አስክ ንዳል ለሃረሰዩ ሐልየት አፍረ።


መደት ሐቱ በረከት እት ለዓል ሰጤሕ ሮሻን ትያትር ቀዳማይ ሀይሌሰላሴ ግሱይ ዲብ እንቱ። እት ገጹ ለዐለ ደብር ገናድ እት ለዐፊ።

“ትርአየኒ ጎቦ ተኸዊላ” እት ልብል ምን ቀር ልቡ እት ዶሉ ለከትብዩ፡ “መለይ” ለትብል ወቅት ለኢለአሸለሐ ሕላየት ሐሉ። “ኣታ ሓላፍ መንገዲ፡ ‘ተረኹብኪያ መለይ ሰላም በለለይ!”

በረከት እት አዲድ-አበበ እት ከልአዩ ወክድ፡ እት ሰነት 1968 ድሩስ ክርን፡ እት ሰነት 1969 ድሩስ ‘ድራማ’፡ ወዲብ 1971 ህዩ አትባዩእ መሰቀት ደርሱ። በረከት እት ቀበት አቶብዩ ዲብ ሀሉ፡ ምርት ምን እብ ዓዳት ጋና እንዴ ኢከሴሕ ለናደለ ፈናን ዐሉ። ክም ሰፊር ሐልየት ኤረትርዩ ዲብ አቶብዩ እንዴ ገአ ህዩ። እግል ምን ኤረትርዩ አስክል ዱለት ለመጽአ መሰል ሰኔት ወመተንከብ ገአ

እሉም።
“ሚለና ዘዋሪት ማኪና” እት አዲስ አበባ ዲብ ሀለ ሐለዩ። ከአፎ ክም ሐለየ ዲብ ደግሞ፡ “እት አዲሱ አበበ ለዐለው ኤረትርዩን እብ ፍክሩ፡ ነፋሲት፡ ግንደዕ፡ ባጽዕ፡ አስመረ፡ ጎርጉሰም፡ በሐር ቀየሕ፡ ወብዕድ. . . እግል ልንሰኦም ሐዘ። እብ ዝክርያት፡ እለ ጀነት ምድር ላተ ዝሕረት-ግርመት ጠቢዐት ለትሀየበት ምድርክ ኢትትረሰዕ እግል ኢበል ምን ሐዘኩ ቱ።” እት ለብል ለአበርህ።

ዲብ ገጽ 12 ለተላላ...



ዶ/ር ዑመር ዑሰማን

አማዳድ፡ ለኢሰክትካርም ሕልም

ብዝሓም ዐባዩ አንፋር አቶብዩ፡ እድንያመ ምን ትቀየረት አስክ እለ ምን አፍካር እስትዕማር ለትባልሐው ኢመስሎ። ወጠኖም ወሽዐም ልምህጽ ለህለ ናይ ቆምያት ወቀባይል ስያሳት አሳሱ እሊ ናይ መምለከት አፍካር መስኢሊን ሽዑብ ሕነ ለልብሎ ስያሰዩን አቶብዩ እት ገብኤ፡ መረድ አማዳድ ወኢናይክ ርዝቅ እግሉ መትሳሃይመ ምስሉ ለገይሰ ምን ፍክርያት መምለከት ለልትበገስ መረድ ቱ።

መብዝሐ ወቅት እት ቀበት አቶብዩ እት ለትፈናተ አካናት ፍንጌ ብዝሓት ቆምያት ለልትከለቅ በእስ ወፈንጨጋር አሳሱ መረድ አማዳድ ወሓዚ ኢናይካቱ። እት ፍንጌ ለትፈናተየ ጀሃት አቶብዩ፡ “ቆምየቼ ቆምየትከ”፡ “ወምድርዬ ምድርክ” ለህለ ፈንጨጋር ወበእስ ክሉ ለልፍሀሙ ቱ።

እብ ፍንቱይ እትለን ለሐልፈየ ሰኖታት፡ ሰረን ቆምያት አቶብዩ ምነ ምድርናቱ ለልብላሁ አማክን፡ ኢውላድ ቆምየተን ላቶም አንፋር ቀቲል፡ ጠረዝ፡ ዐዘቦት፡ እተ ክምሰልሁመ እግል ሰኔን ለነብረው እቱ ምድር እንዴ አትሐደማክ አግዐዞት ልሙድ ጋራት ጋብእ ህለ።

ገባይል አቶብዩ ክም ውላድ ሐቱ ዐድ ጥውር፡ እት ክለ ወጠኖም ክም ምራዶም እግል ልትሐረኮ ወልስከኖ ለወጅቦም እት ገብኤ፡ እት ቀበት ሐቱ ዱለት ናይከ ግን እንዴ ሐሰብክ ክም ቀትረ፡ እት አካንክ ለነብር ወድ ብዕደት ቀበሊት እቱ ደረር አጅረዮት፡ እተ ናዬተ ለትብለ አካን ወድ ቆምየት ብዕደት ክም ኢለአቱ መትካራፍ፡ እግል አሳስ ዘበናይ ድወል ላተ ውሕደት ገባይል ለልሐምርግ ቱ። እሊታት፡ እት ፈንጠሮት ወመትካፋል ዱለት እግል ለአብጼሕ ለቀድር ተየልል እት ደረጀት እኪት ዕዱይ ህለ። አስክ እግል ዓሲመት አቶብዩ አዲስ አበባመ፡ “ናዬተ-ናዬተ” እተ ልትበህሎ እተ ደረጀት ኩሩያም እንረክቦም - ለናይ ዮም አጅያል አቶብዩ።

መረድ ሕልም አስሐባብ ዐባዩ አቶብዩን እት ቀበት ዐዶም ሌጠ ለበጥር ሰበት ኢኮን፡ ብዕድ ለትኬለመ ዋለ መሻክል አዝማት ቱ። ሰበብ ወዲቅ ለትፈለለው አንዝመት ወሕኩማት አቶብዩ ለቀዳምያምመ፡ እሊ ምን ናይ ምልክ ፍክርያት ለልትበገስ ሕማም አማዳድ ወሓዚ ኢናይክ ላቱ ዴራይ አክላቅያት ቱ። እብ ፍንቱይ አስክ በሐር አስሐባብ ወባብ በሐር እብ ሐሊት እግል ትሸተፍ መትሸናህ፡ እግል ክሎም ለሐልፈው አንዝመት አቶብዩ እት ወዲቅ ለአብጸሐዮም ጋር ቱ።

መረድ አማዳድ፡ አቶብዩን ለዐባዩ ብዙሕ ወቅት ለፈሸለ እት ገብኤ፡ እሎም አንፋር አስክ እለ ምን ሰካቦም እግል ልቅነጾ ኢቀዲርም ለለአትፈክር ቱ። እትለን ለሐልፈየ አዋርሬሕ ህዩ፡ እሊ ሕማማ እሊ እንዴ ደግሰዮም እብ ሐዲስ

ቃሎት እት ወዴ እንሰምዕ ህሌን። መአንብተት መሐልሊን ጅኦግራፍ ወሲያሰት፡ እት መሕበራይ ወሳይል አላም ሌጠ እንዴ ኢገብኤ፡ እት ናይ ሕኩመት አቶብዩ ቀነዋት እዕላም እንዴ ተዐዘመው፡ እት ደጉሙ ልትረአው ህለው።

እግልን እግል ለአክልጦ ወለአሽክፎ ምንመ ኢቀድሮ፡ እግል ሽዑብ አቶብዩ ላተ፡ ለምሩድ ሕምዝ አፍካርም ነዝሐ እቱ ልውዕሎ ወልትመየው ህለው። ለመክሐዳሆም ህዩ፡ ዲበ እሙር ናይ አድጋማት ተእሪክ አቶብዩ ለአሳሱ ናይ ፍጥር ሐካኪቶ ተአተንክብ። ምን ቃኑን ወአማን በረ፡ እቅትሳድ፡ ብዝሐ ሽዑቡ ወናይ ቆምያት አሰባብ ክም ምስምሰ ልትቀደም ህለ። እብ ፍንቱይ ሐቀ ተሚም ሐርብ ትግራይ ወፊርመት እትፋቅ ፕራቶርየ እግል እሊ መጃል እሊ ክም አጃንደት ገዛፍ ጸብጠቱ ህሌት መጅሙዐት ሕዝብ ‘ብልጽግና’።

እለ ለእብ ብዝሐ ሽዑብ እት ቀር አፍሪቀ አወላይት ለትትረተብ አቶብዩ፡ ቃኑን ለለአምሮ፡ እግል እድንያይ ዕላቃት ወአዳብ ለልትከቡቶ ላግም መስኢሊን ምን ትረከብ፡ ረማቂት ባብ በሐር እንዴ ኢትገብኤ፡ ድወል ብዕዳት ባብ በሕረን እግል ትትነፈዕ ለረምቃህ ወገብአት ዐለት። ሚናት ኤረትርዮ፡ ጅቡቲ፡ ሱዳን፡ ሶማልየ ወኬንየ እግል ትትነፈዕ እበን ለክለአ ለበብ። እድንያይ ቀዋኒንመ እሊ ለመኔዕ ኢኮን።

ባብ በሐር ለአለበ ደውለት፡ ምስለ ባብ በሐር ለበን ደውል እንዴ ትፋህምት ወሲያደተን እንዴ ሐሽመት ወዐቅበት፡ እብ ሚናተን እግል ትትነፈዕ፡ እብለ ገበይ እለ እድንያይ ማያት እቱ በዋቢር በሐር እግል ተሐርክ ትቀድር።

ምን እሊ ናይ መትነፈሪት በክት ወለዐል ላኪን፡ ለገአ እድንያይ ቃኑን ለለሀይባቱ ሐቅ ወዋጅብ ኢህለ። ክድመት ሚናት አሳስ ናይ እቅትሳድ መሳሌሕ ሌጣ ቱ፡ ክእኒ ምን ገብእ ግድም፡ እግል በዐል ሚነት ወመትነፈዳይ ክልኢቶም ለነፊዕ ቱ። እብ ፍንቱይ አቶብዩ ምስል ብዝሐ ሽዑቡ እግል ክድመት ሚነት እንዴ ሀበት፡ እግል ትክሰብ ምነ ለኢትትሸንህ ደውለት አቅሊምነ ኢህሌት። እብ ዐመልመ ጅሩብ ዐለ።

ሐቀ ሕርየት እርትርየ አስክ ሰነት 1998 አቶብዩ እግል ሚናት ኤረትርየ እብ ለሀ እግል ትትነፈዕ እቡ ሕኩመት ኤረትርየ እጅዝት እለ ዐለት። ሐሽም ወያኔ እንዴ ትጋረፈ ኖሱ አስክ ለአዝም ምኑ ህዩ፡ ሚናት ኤረትርየ እግል ገባይል ክልኢተን አኣረትርየ ወአቶብዩ ክድመት ሰኔት ለሀይብ ጸንሐ። እተ ውያኔ እት ረአሰ ኤረትርየ ወራራት ትውዴ እቱ ለዐለት ወቅትመ እንዴ ኢትርፍ፡ እት ሰነት 2000 ሳልሳይ ወራር ወያኔ፡ እት አቶብዩ አልሀሽ ዶል ሳደፈት ኤረትርየ፡ መአሰሳት ረድኤት እብ ሚናት ዐድነ እንዴ

አተየ ሰዳይት ረድኤተን እግል ለአብጸሐ ምን ሰኔ ምራድ ለትበገሰት ንየተ እጅዝት እግልን ዐለት። ምናተ ወያኔ ኤረትርየ በደል ትከሰብ ሕነ ንሕገል እበ ልብል ፍክር እግል ረአይ ነክረዩ።

ዐባዩ አቶብዩ መባጽሖም ወንዮቶም መትነፈሪት ሚናት ምን ገብእ ወአባዩ አለቡ፡ እብ ዝያድ ኮማን እግል መሳሌሕ ክሉ ገቢል ሰበት ቱ። ድወል ቀር አፍሪቀ እብ ቀልብ ፋዬሕ ወትከቡተያህ። ላኪን ሕልምም፡ ኢናይክ በሐር ወግንራሪበ እብ ሐሊት እንዴ ነዝዐኩ ጠበዐት ምጅተማዕ ወቆምያት እንዴ ቀየርክ ባብ በሐር ተወቦት ወመሊኩ አርዛቅለ በሐር መትነፈሪት፡ ወእተ በሐር ቅወት ዐስከርየት ወዲ ክምቱ እንዴ ኢለሐቦግ ወኢክጅሎ ቱ እት ልትገሮሩ ልውዕሎ ወልትመየው ህለው። እሊ ምራድ እሊ ህዩ፡ ዘበናይ ሕዱድ ድወል እብ ቀየሮት ሌጣቱ እግል ልትመም ለቀድር።


እትሊ ለህሌነ እቱ ዘበን ምጅተመዕ እድንየ ልትመረሕ እቡ ለህለ ሚሳቅ ምጅልሰ ቅራን ምን ገብእ ወውሕደት አፍሪቀ እሊ ለለአጅዝ ኢኮን። ምር ምን መባጥር ገቢል እድንየ፡ እግል ስያደት ሕዱድ ድወል እንዴ ሐሽምከ እብ እሕትራም ሕድ ነቢር ቱ። ሕዱድ ናይ ዘመነ ድወል እግል ትቀይር ጀሪቦት ለለአመጽኡ ተአሲር ቀሊል ሰበት ኢኮን፡ እብ ለገአ ሰበብ ክበት ኢኮን።

እግል መሰል ሶማሊላንድ እግል 30 ሰነት ምን ሶማልየ እንዴ ትፈንጉት ምንመ ጸነሐት፡ ምጅተመዕ እድንየ ላኪን አስክ እለ ክም ዱለት ስያደት እግል ለሀበ ኢቀድረ። እግል ስያደት ሀዩብ ምስል ክሉ መዓዩር ወቀዋኒን እድንየ ለልዳገሽ ወለለአክርብ ምን ገብእ ለልትቀደር ኢኮን። እሎም ዐባዩ አቶብዩ እተየ እድንየ ነብሮ ህለው ገብኤ፡ ለለአትፈክር ቱ።

ሓዚ አቶብዩ እግል መትነፈሪት ከደማት ሚናት ክሉ ወቅት ክበት ቱ። ለአቶብዩን ለሐዝዉ ህለው ላኪን መትነፈዕ ሚነት እንዴ ኢገብኤ፡ ኢናይክ ምድር ወበሐር እብ ሐሊት ነዘዕ ቱ። እሊ ህዩ ወራር ሰበት ገብኤ፡ እግል ልግባእ እቡ ለቀድር ለገአ እድንያይ ቃኑን አው በክት ኢህለ።

ልግባእ መኢልግባእ ላኪን እብ ሐሊት ጀሪቦት ሌጣ ቱ እግል ልትጀሪብ ለቀድር። ህቶምመ እሎም ዐባዩ አቶብዩ እግል መትነፈሪት ሐሊት ወወራር ክም ምር ሕርያን እንዴ ኢክጅሎ ልቡሎ ህለው። ምናተ መትነፈፈዕ ቅወት ወወራር እት አንዝመት አቶብዩ ለኢጀረበዉ ኢኮን። ብዙሕ ወቅት ትጀሪበ ወእብ ትሉሉይ ለፈሸለ ጋር ቱ።

ሻለቀ ዳዊት ወልዴገርገስ ለልትብህል በዐል ሰልጠት አቶብዩ ለዐለ እተ “ክህደት በደም መሬት” ለልብል ክታቡ፡ አቶብዩ እት 30 ሰነት ናይ ቅብለት ሐርብ(ሐርብ ንዳል ጀለ ሕርየት ኤረትርየ)፡



እግል አድመየት ስያደት ወባብ በሐር ሐድ ምር ሚልዮን ጅንዲ ክም ከሰረት ሸፊሕ። እሊ እት ዘበን ሀይሌሰላሴ ወደርግ እት ገብኤ፡ ሐቀ ወዲቅ ናይ እሎም አንዝመት እብ ሰዳይት ሽዑብ ኤረትርየ እት ሰልጠት ለመጽአ ንዝም ወያኔመ፡ ኩዳም ስትራተጂ ውላድ ካርጅ እንዴ ገአ ወእት ድወል በረ እንዴ ትዘቡ፡ እግል ደገም ወራር ትበገሱ። ማል ወአርወሐት ሽዑብ አቶብዩ እቡ ተልህ ወአብደ። ልግባእ ደአም ለቀደሚሁ ዐለው አንዝመት አቶብዩ ለኢተዐወተው እቱ ጋር እግል ለአትምሙ ኢቅድረ። ሰልሲቶም እሎም አንዝመት አቶብዩ፡ እብ ናይ ሐሰት ተእሪክ ወመረድ አማዳድ፡ እት ረአሰ ማል ወመምተለካት

ወምለዐል ክሉ አርወሐት ገቢሎም ለአጅረወ ከሳር ቀላል ኢኮን። አዜ ህዩ፡ እለ ጀሪመት እብ ሐዲስ እግል ልድጎመ ጀርባ ህለው፤ ለለአትፈክር ቱ።

እብ ሰላም ነቢር ወከሲብ ልትቀደር ለልብል ላብብ ትሰኣነ ገብእ እት አቶብዩ፤ አውመ ሽዑብ አቶብዩ በሐር ሐቀ ቱልካሁ አፋሁ ማይ መልኤ፡ ሰበት ገብእ ናይ ክርስ መሻክልን እት ብዕድ እግል ማሰሶት ሰዴነ ለልብል ፍክር ቱ። እሊ በሰር እሊ እትሊ ወቅት ጎነ ለገአ ነፈር እግል ልቅሸሸ ለቀድር ኢኮን። ሽዑብ አቶብዩ ለሐልፈ ተእሪክ ብዙሕ ሰበት አድረሰዩ።

ዴማት፡ “መጀለት-መንእሰይ-ዕልብ 80”

ቀዋኒን መድረሰት፡ ወክደብ ዩረሰ

- መዳርስ እት ሸቅለን ለሳዕዳህን ቀዋኒን በን። እለን ቀዋኒን ደረሰ ብዝሕት መንፈዐት በን።
- ፈዳብያም ደረሰ ህዩ እብለን ደሀብ ቀዋኒን መድረሰት ልትመረሐ።
- እብለን ደሀብ ቀዋኒን ሰበት ልትመረሐ ህዩ፡ እት መድረሰቶም ፈድቦ ወክሉ ፈትዮም።
- ፈዳብያም ደረሰ እት መድረሰት ወምን መድረሰት በረ እበ ቀዋኒን መድረሰት ገይሶ ወለሐሹመ።
- ዕዉታም ድድ ቃኑን ኢገይሶ።
- ቀዋኒን ወለ አልፍ ዶል ምን ከብዶ ክም ሰድዎም እት ኢኮን፡ ድዶም ክም ኢኮን ሰበት ለአምሮ እበን ልትመረሐ።
- ፈዳብያም ደረሰ እግል ምደርሲኖም ምን ዋልዴኖም ወለዐል ለሐሹሞም።
- ምደርሲኖም ወለ አልፍ ዶል ምን ክልጦ እብ ሕሸመት ለአፍሁሞም እት ኢኮን፡ ክም መልህያሞም ኢኮን ለልትሃገው ምስሎም።
- ፈዳብያም ደረሰ ድቪዘ ለገረመት ልባስ ደረሳይ ክመተ ሰበት ለአምሮ እት ጅወት መድረአቶም ሌጠ እንዴ ኢገብኤ እት መድረሰት እት ገይሶ ወምነ ለአቀብሎ እብ ንዝም እንዴ ለብሰወ ገይሶ።
- ብዕዳም እግል ልምሰሎ ለኢትገብእ ሓጀት ኢወዱ።
- ፈዳብያም ደረሰ ባብ እንዴ ሐድገው እብ ብነ ኢነጥሮ።
- ለገአ ሸቅል ቤት አው ፕሮጀክት ሐቀ ቦም እንዴ ሸቀው እት ወቅቱ ሰለሙ።
- ክእነ ሰበት ገብእ ህዩ ክሉ ፈትዮም።
- ፈዳብያም ደረሰ እግል ንግበእ ክመ እዩሳም ወፈዳይብ ደረሰ ለወድዉ ንውዴ።
- ዕዉታም እግል ንግበእ ዕዉታም አንፋር ለገይሶ እበ ገበይ ሕርያን ትግበእ።

ዓማት ከውቀት ደብ ክዴና ቀ

እት ሓደት ምን ፋሬሕ እት እንተ ነቢር ለተዐቢ አለቡ። ምናተ፡ ለውቀት ወራሕት እብ ከአፎ ትረክብ? እሊ ሰኣል እሊ እብ ቀሊል ለልትረክብ ኢኮን። ዑለመ፡ ሚርሐት ደያናት ውበዕዳም ላባም እብ ክሰሱ እሊ ጋር እሊ ብዞሕ ሁጉያም ቶም። ምናተ፡ ለገብአ ነፈር ምስል ናይ ኖሱ መካብብ እንዴ ገንሐ ሰበት በልሱ እብ ከአፎ ፋሬሕ ወልወቅ ትገብእ? ለልብል



ሰኣል ናይ ሕበር በሊስ እግል ልትረክብ እግሉ ቀሊል ኢኮን። ዓማት ለውቀት እግል አመሮት ብዞሕ ድሩሳት ጋብእ ቱ። ገሌ መትራመረት ክእነ ልብሎ፡ ሰሮም ገሌ ለውቀት ገናዐት ቱ፡ ልብሎ ምናተ እግል ክሉ ኢትወክል። መንበረት ስኔት ወማል ለቦም ልወቃም ቶም ለልብሎም ህለው፡ ምናተ፡ ራክባም እት እንቶም ቀመት ላሊ ለኢነስሐመ ኢትሐገለው። ለውቀት አው ፈርሐት እት ለትፈናተ፡ ሰያሰያይ፡ መሕበራይ ወእጅትማዕያይ ጋራት ተአሲር ወዴ። እግል መስል፡ ለውቀት ሚተ ወእብ ከአፎት ትረክብ እንዴ ትቤ ዶል ትትሰኣል፡ ለትፈናተ በሊስ ትረክብ። ሰሮም ገሌ ምስል ዕያልክ ነቢር ቱ ልብሎ እት ህለው፡

ሰሮም ገሌ ምን ረብሸት ወተዐብ እብ በይንክ ነቢር ቱ ልብሎ። ሰሮም ገሌ ህዩ እብ አደብ ቃኑን እንዴ ሐሽምክ ገዩ። ምስል አዳም እብ ሕበር ከዲም ወነቢር ዓማት ለውቀት ቱ ልብሎ። ገሌመ፡ ምን ማልክ እግል መሳኪን ሰድየት፡ ዝያደት ገበይ ረቢ ጽብጠት፡ እኪት እግል ኢትውዴ መትደጋግ ለአግደ ዓማት ለውቀት ቱ፡ እት ልብሎ ሸርሖ። ገሌ ህዩ፡ ደለ እለ ሐዘክ ረኪብ ቱ እት ልብሎ ሸርሖ። ገሌመ መንበረቶም ምስል ብዕዳም እት ለአትጃግሮ፡ ክመ ራክባም፡ ክመ ካሰባም፡ ክመ እት ምህሮ ውቁላም፡ ክምለ እት ሰልጠት ለትገሰው... እግል ልግብኦ ልትጸገሞ። ለውቀት ላኪን አለቦም። ሰነክ ለልትበህል ፍላሰፈ፡ ምስለ እት እት ድዋሩ ለህሌት ጠቢዐት

እንዴ ትመሳነ ለነብር ነፈር ልወቅ እግል ልግብኦ ቀድሮ ልብል። እብ ረአዩ፡ ፋርሓም ላቶም አንፋር እለን ለተልየ ለወዱ ቶም ልብል፤
□ እግል አርወሐቶም ለመልኮ
□ ምን ቀዳምያም ወምን ኖሶም ተጅሪበት ለነስኦ
□ ምስዳር ሻፍገት ለኢነስኦ
□ እበ እለ ረክበው ለለአገንዮ
□ እት ብዕዳም ለኢቀንኦ
□ እብ ለሀቡቶም እግል ልንበሮ ለከድሞ
□ ምን እለ ረክበው እግል አዳም ለከፍሎ
□ እድንየ ላምንታይት ክምስል ተ ለለአምኖ... ወእሉ ለመስል።
ሕነ ህዩ እብ ከአፎ ፋርሓም ወልወቃም እንገብእ ሓሰባም ሕነ ማሚ? ርሕነ ንፈትሽ።

ክከዶ ምብክሰ ትከከክ ክከቡ


መባልስ እት ዕላቀት ዕያል ልግብኦ ወመሳኒት ሰኔ ምህም ቱ። አከይ ምብላሰ ትከልለ አለቡ። ምስል መልህይኩ ጋሽ፡ ዕያልክ ወግግሬክ አከይ መባልስ ብሂል እት ብቐት ከፊክ ሰበት እሊ መትደጋግ ለአትሐዘ። ክል ነፈር እለን ለተልየ እግል ልውዴ ለአስትህል፤

- እሰልፍ አርወሐትክ ፈተሾት። ሚ እብል ህሌት ወእብ ከአፎ እንዴ ትቤ ሕሰብ።
- ዐገብ አብዝሐት አከይ ዕላወት ከልቅ። እብ ከአፎ ተዐግብ ወትሰይሕ አመሮት ወምስል ላብም መትጋማይ ለአትሐዘ።
- አዳም እግል ተዐግብ ቀሊል ቱ። ናይ ርሕክ ጌጋ አመሮት ላኪን ሰኔ ክቡድ ቱ።
- ምራድ ወኤታን መልህይክ አመሮት ምህም ቱ።
- ለመልህይክ ደግሞ እግልክ እት ህለ እብ ክሉ ቀልብክ አተንሰዮቱ ዋጅብ ቱ።
- ሰምዲትክ ራቀቦት ወእግለ ሳድፈክ ከለጥ እብ ቅሩትክ

ሰይሖት እት ሀደፍክ ለዐውተኩ።
• እት ፍንጌ፡ እግል መልህይክ ኢትአካርመ። አሰክ ለአተምም እብ ዋጅብ ትጸበሩ።
• መልህይክ እግል ትሰይሕ እግል ትግብእ ኢትቀድር።

ዶል ተሐዘ፡ እሰልፍ ናይክ ከለጥ እግል ትሰይሕ ወጅብ። ናይለ ከለጥ ኢሰይሐክ ምን ገብእ እግል ብዕዳም መስል-ሰኔት እግል ትግብእ ኢትቀድር።

ክጥዐሚቶ



አምዕል ሐቲ ዎሮት በሲር ወጸሩ ላሊ እት መናሰበት እግል ልሕደሮ ምስል ትበገሰው። ዶል ለእለ ቀንጸው፡ ለበሲር ፋኑስ እት እዴሁ እንዴ ወደ ትበገሰ። ለጸሩ ህዩ፡ “እንተ በሲር ሰበት እንተ ለፋኑስ እግልሚ ትነሰኡ ህሌክ? እት ልብሎ ትሰኣለወ። ክእነ እት ልብል ህዩ በልሰ ዲቦም፤

“አነ እሊ ፋኑስ እግልኩም ናሰኡ ህሌኩ። ሰበቡ ህዩ፡ አነ እበ ናይ ጅወ ዕንታቺ እግል እርኤኩም እቀድር። እንቱም ላኪን ናይ ጅወ ዕንታት ሰበት አለብኩም በርደደህ እት ወዱ እግል ትደርኩኒ ሰበት ትቀድሮ ዝያደት እግልኩም ለአትሐዘ።”

Improve Your English

Unit One

Present Simple (Do/Does)

I, we, you, they --- do do, read, like, work, play
He, she, it ----- does does, reads, likes, works, plays
Example:- I like big cities. We do a lot of different things in our free time.
They open their shops at 7:00 am.
She is very clever.
He always gets up at 6 o'clock.

////////////////////

- The Sentence
 - Sentence word order
 - The basic word order of an English sentence
The meaning of an English sentence depends on the word order.
 - We put the subject before the verb and the object after the verb.
 - Adverbials (How? Where? When?) usually come after the verb or after the object:
 - The basic word order of a sentence that is not a question or a command is usually:
Subject, verb, object, adverbials (how?, where?, when?)
I (s) bought (v) a hat (o) yesterday (when).
The children (s) have gone (v) home (o or where).
We (s) ate (v) our meal (o) in silence (how).
 - We also put the time reference at the beginning: Yesterday I about a hat.
Exercise:- Mark all the sentences in the exercise S V O to show Subject, Verb, Object.
E.g. My sister (s) likes (v) biscuits (o).
 - The guests have enjoyed the meal.
 - Jon can't play the game.
 - Will the goalkeeper catch the ball?
 - The visitors have seen the new buildings.
 - The plumber is going to fix the pipe.

////////////////////

Common mistakes in English

Misused Forms

- Doubt(n) of or about, not for.
Don't say: I have no doubt for his ability.
Say: I have no doubt of (or about) his ability.
- Dressed in, not with.
Don't say: The woman was dressed with black.
Say: The woman was dressed in black.
- Exception to, not of.
Don't say: This is an exception of the rule.
Say: This is an exception to the rule.
Note: But we say “with the exception of”: as “He liked all his studies with the exception of Latin.
- Exchange for, not by.
Don't say: They exchanged wheat by rice.
Say: They changed wheat with rice.
- Fail in, not from.
Don't say: He failed from mathematics last year.
Say: He failed in mathematics last year.

////////////////////

Teacher jokes

Father to son after exam: “Let me see your report card.”
Son; “My friend just borrowed it. He wants to scare his parents.”

ጃላል ነቅፈ ማሌ ወዮም

ጃላል ነቅፈ ማሌ ወዮም እበልብል አርእሱ፡ ምስል ገዳይም ውላድ ነቅፈ ላቶም እብ ክርን ለገብአት መቃበለት ወዲብ በርናምጅ ፊድዮ እብ ከፈፍል ለፈግረ፡ ነቅፈ ማሌ ሚ ትመስል ዐለት፡ መንበረት አዳመ፡ ንዳቅ አብያተ፡ አደብ ወሕድርኖት ውላድ፡ ዲብ ነቅፈ ለዐለ ንዛም ተዕሊም ክምስልሁመ አደብ ወእክላቅያት ደረሰ ወምደርሲን ለከሰሰ 3ይ ክፈል እግል ንርኤ ከቅራኣት በኪተት፡



አሰይድ ከንቴባይ ሐሰን



አሰይድ መሐመድ ዐብደሰ እድሪስ



ከንቴባይ ዐሊ ከንቴባይ ዐብማን

ከንቴባይ ዐሊ ወድ ከንቴባይ ዐብማን እብ ሰበትላ ዲብ ነቅፈ ለዐለ ከደማት እት ሸፊሕ ክእነ ልብል፡

“እት ዘበን ቅዱም ዲብ ነቅፈ ሰያቂን ዐለው፡ እተ ሱገ ሰያቂን ዕሉማን ፋር ወዐብማን ሳይቅ ሰይቅ ዐለው፡ ብዕዳም ጃላዲንመ ዐለው፡ እምበል እሊ ጀዛሬን ህዩ ዲብ መዲነት ነቅፈ ክልኣት ነፈር ዐለው፡ ብዕድ መስኡልየት ፋርሰታሌ ዳብጥ ለዐለ ህዩ ወድ ገብራይ ለልትበህል ዐለ፡ አሰክ ህቱ ኢመጽኦ ለጠሊት ኢትትሐረድ፡ ጣህር ሳምዲን ወሓምድ ወድ እድሪስ ወድ አደም እለ ጅማዐት እለ ክምስል በለደየት እንዴ ገብአት ነጻፈተ መዲነት ራቅብ ዐለት፡ ወአካን ሕርዶ ህዩ ዲብ ሸኽተ መሓዝ ዐለት፡ ለወክድ ወድ ገብራይ ሰገ ዲብ ሻሬዕ ረክብ ምን ጀዛር እንዴ ነዘዐዩ አክላብ ለህይቡ ዐለ፡ እብሊ ህዩ እተ መደት ለህ ንዛም ዐለ፡

እለ አውቶቡስ ምን ነቅፈ እንዴ ትብገሰት አፍዐበት አቱት ምንገብእ ዲብ እለ አካን ለጃሚዕ ብእተ በጥር ዐለት፡ ወአፍዐበትም ክምስል እሊ አዜ ለህሊቱ ዕምር ወዐባይ ወአዳመ ብዙሕ ደዐለ፡ ለምድር ክሉ ቃባት ወክደን ዐለ፡ ዲብ ግዝግዝ ወድ ሸከር አቡሁ ዐለ ዲብ፡ ዐሊ ሸከር ፈቀጥ፡ ወምን ግዝግዝ ከረን ተኣቱ፡ እለ ዐረብየት እለ ዐረብየት ነዲፈት ዐለት ሰጥገ መን ልትበህል ዐለ፡ ወምን ነቅፈ አሰክ ከረን ሰለሰ ዶላር እንደፊዕ እተ ዐልነ፡ እተ ወክድ ለህይ ሰለሰ ዶላር መብለቅ ቱ፡ ማህዩፍ እግል ኖሰ ዲብ መደት ለህ 39 ዶላር ዐለት፡ 39 ዶላር ለነሰእ ለወክድ ለህይ አሚር ቱ፡ ለዘበን ዘበን ቅን ወርክሰ ዐለ፡ ዲብ እለ አውቶቡስ እለ መሳዕድ ለዐለ መሕመድ ከሊፋ ቱ፡

እለ ገበይ እተ ወክድ ለህይ እብ ሸቃለ ትሰኔ ዐለት፡ ዲብ ቅንረብ

“እለ ገበይ ሰለሰ መዐስከር ዐለው እተ፡ ምር ምን ነቅፈ ለአብተዴ አሰክ ቢያን፡ ወምር ምን ቢያን አሰክ ቅንረብ፡ ወምር ምን ቅንሶ ረብ ኬን አሰክ ክብክብ ገይሱ፡ እለ ገበይ፡ ክእነ ክም አዜ እብ ቀበት ሕሊል ትገይሰ ደዐለት፡ እብ ሰምጥሰምጥ ትገይሰ ደዐለት፡ እለ መሓዝ አዜቱ ክእነ ለፊደሐ ዲኢኢክን ለገበይ መሓዝ እንዴ ኢትትከሬ ትገይሰ ዐለት፡ እብሊ እሉም ዲብ ገበይ ሸቁ ለዐለው ሸቃለ ሰርም ምን ነቅፈ ቢያን ለአበጽሐው፡ ወምን ቢያን ቅኖረብ ወምን አሰክ ክብክብ ዲብ ሸቁ ለገበይ ክሉ ረኣሱ ዕጥልት ኢተአምር፡ ወእብላ እለ አውቶቡስ ዲብ ሳምን ክልኤ ዶል እብ ንዝምት ገበይ ምን ወአሰክ ነቅፈ ተኣትቀባብል ዐለት፡ ብዕድ ዐረባት ዐባዩመ ዐለ ፍያት ለልትበህል መካይን ዐለ፡ እለ መካይን እለ ዲብ ሰሕል ግጥን ወብዕድ ሐርሰ ሰበት ዐለ ግጥን ደንክ ዐለ፡

አማንቱ መካሪት ወመባትክ ሕሊል ሕዳይ ክእነ አዜ ለህሊዩ ደዐለ፡ እለ ገበይ እለ ዲብ ወክድ ለህይ ርትዕት ወእብ ሕግስ አድብር ትገይሰ ሰበት ዐለት፡ ክሉ ረኣሱ ዕጥልት ኢተአምር፡ ከረም ወሐጋይ ምን ክድመት ባጥረት ኢተን፡ ለአድብር ህዩ ተሳሕር ደዐለ ዲብ፡ ለገበይ ምን ክትረት መ ሰኔት ዐለት፡ ሓምድ ወድ ሐሰን ወድ ሕመድ፡ ገሉም እድሪስ ወድ ፍካክ ወድ ቴድርሱ ሾክስ ዋገን ዲብ መደት ለህ ለነአሸት መኪነት ነቅፈ ተኣቱ ዐለት፡ እግልሚ ለገበይ ሰኔት ዐለት፡ ወክመ እለ ቤለውክ መጅመዐት እንሰር ዲብ ክረዕ ሻኒኖ፡ መጅመዐት እትሐለብብ፡ መጅመዐት ቅንራረብ፡ መጅመዐት ክብክብ፡ መጅመዐት ቅላመት፡ መጅመዐት ግዝግዝ እሉም ዝላም መጽኣት ምንገብእ ሕድ ልትቀባበሉ፡ ምን ክረዕ ሻኒኖ ለቀንጽ አሰክ እትሐለብብ፡ ወምን እት ሐለብብ አሰክ ቢያን ሸቁ ወምን ቢያን አቅንራረብ ወሰብ ቅንራረብ አሰክ ክብክብ ሸቁ፡ ሰብ ክብክብ አሰክ ቅላመት ኬን ሸቁ፡ ለባሰ ምን እለ ተሐረክ ምንገብእ ሰፋፍ ወብዕድ ደዐለ፡ መጽኦ አሰቡሕ ወባሰክ ትጸዕን ወባሰ አሰቡሕ ሳዐት ሰማን ምን ነቅፈ ልትብገሱ፡ አዜ ሐቆ ልትብገሰ ከሰጋድ ልትከሬ ለፈተራኖ ክምስል ከረ መሕመድ ከሊፈ ቀንጽ ወተዛክር በትን፡ ተዛክር ክለ ለመናጥቅ ህለ እቱ፡ ቢያን ክብክብ ወለመሰሉ ዲብ ልብሉ በትነ እግልኩ፡ ሐቱ ከተሰኒረተ ቡ፡ ባሰ ምንሰር

ቀንጽ ዲብ መርከዝ ቦሊስ በጥር፡ ምን መርከዝ ቦሊስ ክምስል ቀንጽ ኣት ቦሊስ አፍዐበት በጥር፡ አወል ምን ቦሊስ አፍዐበት ልትሐረክ ዲብ መንገሓት ከረን ለህለ ብዳየተ ዘለጥ መርከዝ ናይ ቦሊስ ዐለ ዲብ በጥር፡ ምን እመራም ትጃር ነቅፈ ከረ ዐብደልከሪም ዐገብ ዕመር ድካን ዐለ እሉ ወሐሁ መሕመድ ዐገብ ገህወት ዐለት እሉ፡ እትሊ ወክድ እለ ወድ ወልዱ ዲብ መዲነት ከረን ዲብ ከረን ሱጥር ማርኬት ህለ እግሉ፡ ለደካኪን ናይላ ወክድ ለህይ ክምስል እለ ናይ አዜ ደካኪን ዐባዩ ሱጥርማኬታት ዐለ ወለ ነኣይሸ ከናቲን ዐለ እተ ልብል ሰኣል እት በልስ አሰይድ መሐመድ ከንቴባይ ሐሰን፡


“ወላሂ እብ ነብስ ዐድ አናቲ፡ ተመር ዐድ አናቲ ለለአመጽኡወ እተ ወክድ ለህይ ለዐርየ ዐለ አለቡ፡ ምስል እክል ማሸኣለ ደለ እለ ሐዘክ ትገኔሕ አክያሰ ሙሉእ ቱ፡

ቡን እተ ወክድ ለህይ ለትፈናተ አንወዕ ዐለ፡ እክልመ እተ ክምስልህ ለትፈናተ ዐለ፡ ወማሸለ ለእለ ሓዘክ ትዛቤ፡ ለእክል እበ ኪሱ ኢልትከሬ ልትቤቤር፡ ማሸለ እብሊትፈናተ አንወዕ፡ ሸንራይ ዕፋን ወብዕድ ክሉ ነዲፍ ዲብ እንቱ እት አክያሱቱ፡ ሰበ

በር ክእነ ገንሐው ወዴውትወ ምን ደፋነት፡ ቡን አሸካል ዐለት፡ ቡን ሐቱ ዐለት ጸላም፡ እሉም ሱብለ በር ልዛብው፡ ንዋይ ጠሊት እበ መጽኦ ጠሊት ሐምስ ዶላር ትዘቤ፡ ሕነ አርበዕ እት ሕነ ንዘበዩ ምናም፡ ከእለ ቡንክ ሱቱ እምብሉ እግለ በዐለ፡ ሕነ ለጠሊት ነሐርደ ወንትካፈለ ወለቀርብተ እብ ክልኣት አው ሰለሰ ዶላር ነአዘብዩ፡ ነዊድ እብ ከምሲን ሳንቲም ንዘበዩ ምናም፡ እተ ወክድ ለህይ ልባሰ ትዛቤ ህሊክ ምንገብእ እንዴ አቅረጭክ ተኣከይጥ፡ ዲድ መጽኦ ምንገብእ ሰፋፍ ዲብ ከረ ሐመድ ዐብደሰ እንጽብጥ፡ ሐሬ ክያጠት አፍረንጅዩ ዎሮት ዐምዴት ለልትበህል መጽኦ፡ ህቱ ከይጥ ዐለ፡ ከይዬጤን ሐመድዐሊ ወድ ዐብማን ወድ በርካይ ዐለ፡ መሐመድ ዐብደሰ ዐለ፡ ሕሴን ድሕሊ ዐለ፡ ዐብማን ወድ መሐመድ ገንሸረ ዐለ፡ እለ ከያጤን ጃህዝ አለቡ፡

አዜ ዲብ ሱጥር ማርኬታት ለቴልካህ፡ ሱጥር ማርኬት በቢ ለዐለ፡ እተ መደት ለህ ሐመድ ወድ ሓጅ ዐብማን ጨበዕ ቱ፡ አሰሩ ሐሬ ዐለ ወድ ሐመድኖር እግል ወልዱ ሐመድኖር ዐለ እሉ፡ አሸካል ወአልዋን በዳዩዕ መጽኦ ዐለ፡ ምን እተ ወክድ ለህይ ለንዘከር በቢተ ቅጥረት ምን ለአተቀጥረ ጀክ ካምል ትመልእ እግልኩ፡ ብዕድ ደካኪን ቡን ሸከር ወልባሰ ህዩ ዲብ መዲነት ዐለ፡ ምን ለብሰሰ ደበላን ወአቡ ጀዲድ ዐለ፡ መሐመድ ዐብደሰ እንተ ከያጥ ክምስል ዐልክ ለአሰእሉነ ህለው፡ ከእብ ክሰሰ እለ መክነትክ ወክያጠትክ ምን ተኣሰእሉን፡

“በስ ሕነ ክምስል እለ ከንቴባይ ላብሱ ለህለ ቀሚስ ወሰርዋን ወሰዴርየት እሉ እንክይጥ ዐልነ፡ ወዲብ ክያጠት ምን ከምሲን ሳንቲም ወበዘሐ ምንገብእ ምን ርያል ለሐልፍ ደዐለ፡ በናጥሊን ላኪን ዎሮ ካሰ ዕምዴስ ለልትበህል ከያጥ ዲብ ልትክየጥ ዐለ፡”



ምን ነዋየት መዋሰላት አውቶቡስ ዐለት እግልነ፡ ሰቡይ፡ እለ እሰቡደ ምዶል መጽኦ እምቤ ምንገብእ ዮም አልከሚስ ወአትኒን ትመጽእ፡ እት ሳምን ክልኤ ምዕል ዐለት፡ እተ መደት ለህ እለ ገበይ ሰጋድ ክእነ ክምስል እት አዜ ፍኣይሐት ደዐለት፡ ለሰከት ምን ክረዕ ሻኒኖ ድገለብ አሰክለ ሕሊል ትትከሬ ዐለት፡ እለ ገበይ እለ ሐቆ ሕርየትመ ሰከት መካይን እበ ዐለት፡ ምን ርራብ ዲብ ሕሊል ክምስል ትከሬክ ለሕሊል ድማኑ ወድገለቡ ነላት ወገረዊት እቡ ምሉእ ዐለ፡ ዲብ እለ ሕሊል እሊ አዳም ደዐለ፡ አዳም ሰበት ደዐለ እቱቱ ህዩ ሐዋናት ከደን ምሉእ ለዐለ፡ ቢያን ምን ዐድ ሕጃይ ሐመድ ሕጃይ ለልትበህል እናስ ዐለ እቱ፡ ሐመድ ሕጃይ ድኬናይ ዐለ እግሉ፡ እት ክብክብ ዐለ ቤለሊ ዐለ፡ ዐለመ ድካን ዐለ እሉ፡

ሸቃለ ዐለው፡ እሉም ሸቃለ እሉም ምን ወአሰክ ለገይሰ ገበይ እብ በዳይል ወገረዋይን እንዴ ወደው ለአሰክ ዐለው፡ ወለ ብነ ለእብ አጥራፍ በንዉ ምን ቅያስ ወለዐል ሰኒ ወሳሬ ዐወትፋድ ዐለ፡ ወመስኡል ናይ እሉም ሸቃለ ሰከት ህዩ እግል እሊ ወድ ገብራይ ሐሁቱ፡ ምስሉም ሸቁ ለዐለ ወአሰክ እለ እብ ሐያቱ ዲብ ነቅፈ ለህለ ኢብራሂም ረጅብ ቱ፡ እሉም ሸቃለ እሉም ሕዱድ ስም ወዲብ አርድ ብዕድ ኢሊሐልፎ ዲብ እለ መንጠቀት ሕዳይቶም ለሸቁ፡ “አማንቱ ክምስለ መሐመድ ከንቴባይ ሐሰን ለቤለዩ፡ እብ ፈድል እሊ ሸቅል እሊ ገበይ ነቅፈ-አፍዐበት ከረም ወሐጋይ ምን አቶቡስ ባጥረት ኢተአምር፡ ዲብ እለ መሐመድ ከንቴባይ ሐሰን ልብላ ለዐለ ዲብ ወሰክ መሐመድ ዐብደሰ ክእነ ልብል፡

ምን ሕላይ ቀዳምያም


እተ ዘበን ቅዱም አንሰ እት ሞት ኡብእሰተን አው ፋርሰታተን ለሐልዩ በክያሆም ወለሕላይ እግለ ማይት ዋሰፍ ወሸፊሕ፡ ሰሩር ህዩ ልትበህል፡ ምን ብዙሕ እለ እሲት ሰመረ ልዑል ወድ ከንቴባይ እግል ብእሰ ለሰረተ ንርኤ

ማይ ጸዕደ ገኣኑ ለእት ደገድግ ሻርብ
ብዔር ኢጸውረኒ መፍፋድ ወድ መቃርብ
እምበል ረበዕ ርቡዕ ለእበን ወዕጪይ ጋርብ
ከሃልቱ ወ'መደቢ ወድመል እት ሕጎሰት
ነሰኣ ምን ሚቡ ለሃዲ ምስሉ ሞተት
እለ ድመል ገምዩ ዓግብ ኢፈግረ
ድመል እግል ፈዳብ ክብት ተ እግለ ለነብረ

ከንቴባይ ጃውጅ ውድ ፍካክ ህዩ እለ ሰሩረት ክም ሰምዐ ቤለ “ለከሃል ወም'ደቢ ዲ እግልዬ ወአሰተህለት” ለሓይላዩ ህዩ “ለከሃል ወመደቢ እግል ጃውጅ ቦለ፡ ሹምቱ በዐል መምበር ወጸብጣይቱ በዐል ሞረ” እንዴ ቤለ ሐለዩ፡ ወእሲት ሰመረልዑል ክም ሰምዐት እግለ ሰሩረት ብእሰ ለሓይላይ ጃውጅ እት ሕላይ እንዴ በደለዩ እግል መምባሁ ክም ሐመደ እብ ድግማን ክእነ ሰረት

ሐየት ልንሰኣክ ምን ለዐንደብ
ሰጋክ እንዶ በልዐ ዕጽምክ ኢልትረከብ፡፡
ጃውጅ ልዝበጠክ ምን ልትቀጽብ
ረቢ ለውዕሊኒ ብካይ ሚ ልትገድብ፡፡

ዴማት= ክታብ ኢድጋማት ወዓዳት ትግሬ 1910



ፖርቱጋል ወኖርወይ፡ ዲብ ካስ ዐለም ሐልፈዩ

** ኢጣልያ አዜመ ዲብ ክጡረት ትትካፊ **



ሰንበት ዐባይ ምን ገጽ ላለ፡ ገሌ ድወል አርብ ናይ ደንጎበ ናይ መጅሙዐተን ትልህዩ እግል ካስ ዐለም 2026 እተ ወደዩ ዲብ ወቅት፡ ፖርቱጋል ወኖርወይ ዲብ ጅግረ ለትአትዮን ተዝከረት ረክበ ዲብ ህለዩ፡ ኢጣልያ ላኪን እት ተልገ ትካፊት።

ፖርቱጋል ሌለት ከሚሰ ምን ጸብሬ ክል ነፈር በረ እብ ጅምሁርዮት አየርላንድ 2-0 ሰበት ትቀለበት፡ ምን ጸብብሐ ፅኑቅፍት ዐለት። እት ትልህዩ ካፒታኖሆም ክርስትያኖ ሮናልዶ እብ ከርት ቀዬሕ ሰበት ከሰረወ፡ እምበሌሁ ተልሀው። “ክርስትያኖ ምንመ ኢሊህሉ፡ ምሽክለት ይህሌት” ለተአተብል በቃዐት ወፍገራት ህዩ ረክበት።

ሬናቶ ሼጋ፡ እት ሳብዓይት ደቂቀት ለክስተዩ ባብ ፈሪቅ አርሚንዮ፡ ቀደም ወሐኔ ዕርፍ ጎንካሎ ራሞስ ወፍራንጅስኮ ኮንሴሳኦ ምርዎርት ጎል፡ ጃኦ ኔቬስ ወብሩኖ ፈርናንዴዝ ህዩ፡ ሰልሰለስ ጎል እንዴ አተው፡ “ሃትሪክ” ሸቀው። እብ ርሒቡ ህዩ 9እብ1 ተዐወተው። አርሚንዮ፡ እት 18ይት ደቂቀት ምን ስፔርትሲዮን ጎል እንዴ አተው ዑድላም አምሰው።

እት ሰነት 1966 እግል ሰልፍ ኢነተ መሻረከተ ዲብ ካስ ዐለም ለአክደት ፖርቱጋል፡ እግል ታሰዓይት ኢነታ ተ ዲብ እሊ ጅግራታት ትሻርክ ለህለት - ደርብ ሕድ ህዩ እግል ሳቤዕ ወክደ። እት ሰልፋይት መሻረከተ ናይ ሰነት 1966፡ 3ይ ተርቲብ ለፈግረተ ህዩ፡ ለሕሰት ደረጃታ ተ።

ፖርቱጋል፡ እት ናይ ሰነት 2026

ካስ ዐለም ዱቅሪ ሐሊፈ ህዩ፡ እብ ሰብብለ ዱቅሪ ለነስአዩ ከርት ቀዬሕ ናይለ ምሴት ለህ አወላይት ምዕል ጀዛሁ ለሓሰፈ ሮናልዶ፡ ለክልኤ ሰልፋይት ትልህዩታት ካስ ዐለም’መ እግል ልሕለፋሁ ተ። ሰበቡ ህዩ ጀዛሁ ናይ ሰለስ ትልህዩ ሰበት ተ!

ጂናሮ ጋቱሶ ደርቡ ለህለ ፈሪቅ ኢጣልያ፡ ሚርሓይት መጅሙዐተ ኖርወይ እንዴ ዐዝመት ተልሂት። ኢጣልያ ዋላመ እንዴ ተዐወተት ምስል ኖርወይ እብ ንቅጠት አክል ሕድ 21 እግል ትቅለብ በክት ምንመ ዐለ እሊ፡ እግለ ዐለ ፈርግ ጎል እንዴ በልሰት አወላይት እንዴ



ገአት እግል ተአትትም ላኪን፡ 9-0 እግል ትቅለብ ዐለ እሊ። 1-0 ሕሳል ሚርሒት ጸብጠት ምንመ ተዐሊ፡ 4-1 ሰበት ትቀለበት ላኪን፡ 2ይት እንዴ ገአት አትመመት።

ሰበት እሊ ኖርወይ ዱቅሪ ተሐልፍ ዲብ ህሌት፡ ኢጣልያ ላኪን፡ ለትመጽእ ሰነት ወሬሕ ማርስ ናይ ክልኤ ደርቡት ወሰክ ትልህዩ ልታኪያህ ህለዩ።

አርበዕ ኢነት ካስ ዐለም ለትሆገለት ኢጣልያ፡ ደርብል ሐምስ ኢነት ካስ ዐለም ለከምተተት ሰልፋይት ለህሌት ብራዚል ለትትረተብ ኢጣልያ፡ ዲብ ሐልፈው ክልኤት ጅግራታት ካስ ዐለም (በህለት ናይ ሰነት 2018 ወ2022)፡ ክም ቁበት ልትዘከር። ደርብ አድሕድ ሳልስ ዶለ እግል

ኢቲቂብመ ህዩ ተአፈርህ ህሌት።

ዐዱ ኖርወይ፡ ሐቀ ሰነት 1998 እግል ሰልፍ ኢነተ፡ ወእብ ዓመት እግል ራብዓይት ዶለ እት ካስ ዐለም እግል ትሕለፍ ተረት ውቅል ለተልህ ሃላንድ፡ እትለ ትልህዩ ክልኤት ጎል አተ። እትሊ ጅግራታት ሚመዮት፡ 16 ጎል እንዴ አተ ህዩ፡ እት ለገብአ እድንያይ ትልህዩታት ገብእ ምን ህለ ጅግራታት ተሰፍያት፡ ለትወቀለ መሰጅላይ አግዋል ጋብእ ህለ። ልሰዕ ምውስም ጅግራታት እት ወሬሕ ኖሽምበር ዲብ ህለ ህዩ፡ እብ ፍሌንዶት ዐዱ ወፈሪቁ ማንጅስተር ሲቲ እት 20 ትልህዩ፡ 32 ጎል እትዕለብ ህለ።

እብ ዓመት እሊ ወድ 25 ሰነት መሃጅም ሃላንድ፡ እት 48 ዱላቱ ለወክለ ዲብን ትልህዩታት፡ 55 ጎል ኡቱይ ህለ። ሐቀ 53 ሰነት ህዩ፡ እት እድንያይ ጅግራታት ምንተሐት 50 ጅግረ እተን እንዴ አተ፡ ዝያድ 50 ጎል ለአሰጀለ መተልህያይ ዐለም ጋብእ ህለ።

እሊ ክእነ ዲብ እንቱ እግል ፖርቱጋል አከጀህ ለሳረከት አየርላንድ፡ እት ምሴት ለሃመ፡ እግል ሃንጋሪ እንዴ አስከረት ተእሪካይ ዐውቲ ትከደነት።

አየርላንድ፡ ክልኤ ዶል እንዴ ተዓደለት እት 96ይት ደቂቀት ህዩ ጎል ዐውቲ አምጽአት። ምን ግረ እንዴ ተዐርፊት 3-2 ቀልበት። እብሊ ዐጃይብ ዐውቲህ ህዩ፡ እግል ሃንጋሪ እንዴ ሐልፈት፡ እብ 10 ንቅጠት ካልኣይት እንዴ ገአት ምን አትመመት፡ እት ወሬሕ ማርስ 2026 ናይ ክልኤ ደርቡት ትልህዩ እግል ቲዴ ተ። እትለን ክልኤ ትልህዩ ቀልበት ምን ገብእ ህዩ፡ ሐቀ 24 ሰነት እት ካስ ዐለም እግል ተአቅብል ትትሰኤ ህሌት።

ሰለስ ጎል እንዴ አተ ሃትሪክ ለሸቀ ትርይ ፓርት፡ ምስለ እት ፖርቱጋል ለአተዮም ክልኤት ጎል እንዴ ትወሰከው፡ ምን ክልኤ ትልህዩ ሐምስ ጎል እንዴ ረክበ እት ዐውቲ ዱላቱ ግዴቲ ወደ። እብ ፍንቱይ ህዩ ለማሌ ለህ እት ወሰክ ደቃይቅ ትልህዩ አተዩ፡ ሕልም ውላድ ሁንጋሪ እንዴ ለሐቀቀ ወእግል አየርላንድዩን እት ተማስ ለወሐለ ጎል ዐውቲ፡ እት ዐዱ ዲመ እት ልትዘከር እቡ እግል ልንበር ተ።

ድባርዋ - ሻምፕዮን ብድረ ወጃላት ልቲላሌ

እት ምዴርዮት ድባርዋ ገብእ ለህለ ሻምፕዮን ጅግረ ዐጀላት ማውንቱን ባይክ፡ ለሐልፈት ሰንበት ዐባይ 16 ኖቨምበር እግል ራቤዕ ሳምንቱ አተላለ።

እት ራብዓይ ዲቪዝዮን፡ ፋንኤል ስቲፋኖስ አወላይ ዲብ ለአቲ፡ ናኦድ ዐቅባይ፡ ናኦድ ዮውሀንስ፡ አቤል ዮውሀንስ፡ ዮናታን ሳሚኤል ወኢሰይ ሰዓሬ ምን ካልኣይ አስክ ሳድስ ተርቲብ ለአተው ቶም።

ሳልሳይ ዲቪዝዮን 17 ክለት እት ትጃገረው። ሄኖክ ፍትሓዊ፡ ብርሃኔ ይብራህ፡ መዋእል ጎይትአም፡ ሲራክ ዮዕብዮ፡ ኤፍሬም ሰዩም ወዐወት ጉርጃ ደርብ ሕድ ምን አወላይ አስክ ሳድሳይ ለአተው ቶም።

ምን 32 ዱረት ለሄረረው መትጃግረት ካልኣይ ዲቪዝዮን፡ እት ሰር በህለት 16 ኪሎምትር እት ዱሊት ለዐለት ሾላተ፡ ተመስገን ተኽሉ ምን ፈሪቅ ሓድነት፡ ብእምነት ርእሶም ምን ፈሪቅ ሰላም፡ ወዮናታን አስመርም ምን ፈሪቅ ራህዋ ተዐወተው።

እት ደንጎባመ፡ ተመስገን ተኽሉ አወላይ ዲብ ለአወልውል፡ ሳይሞን ዮናስ - ምን ፈሪቅ ሰላም፡ ዮናታን አስመርም ምን ፈሪቅ ራህዋ፡ ብእምነት ርእሶም ምን ፈሪቅ ሰላም፡ ሰነድ ሳይሞን ምን ፈሪቅ ራህዋ፡ ዩኤል አለም ምን ፈሪቅ ሓድነት ደርቡ አተው።



እት ምን ወክድ ዲብ ወክድ እት ተአሰፍ ትሄርር ለህሌት ድየት ሕዴ መትባድረት ዐጀላት ላተን አዋልድ ክልኤ መትጃግረት ሌጣ ተን ዲብ 20 ኪሎምትር ለትባድረዩ። ልዋም ክዳኔማርያም ምን ፈሪቅ ሓድነት ህዩ፡ እግለ ምን ፈሪቅ ሰላም መትጃግራይተ ሳምራዊት ደበሳይ እንዴ በድረት አወላይት አቲት።

እት ምዴርዮት ድባርዋ፡ መሻረከት አንሳት እት መጃል ዐጀላት እት ተሀገጌ ትገይስ ህሌት። ፈደሬሽን ብድረ ዐጀላት ምዴርዮት ድባርዋ ግድም፡ ናይ አትፋዝያት ወራታቱ ሳክብ ሰበት ህሌ፡ እሊ እግል ለአትሐሶሴ ምስል ሰብ ሸርከት፡ መሕበራት ወጠን ወእዳራት ደዋዬሕ እንዴ ተዓወኑ፡ እግል ለዓብዩ ልትሰኤ ምኑ።

ምን ለትፈናተ ደገጊት ምዴርዮት ድባርዋ እብ ዐጀላት አስክ መዳርሰን ለልትፈረረ ወለዐይረ አዋልድ ሰበት ህለዩ፡ ዲብን እንዴ ረከዘ ለርዝቅ እት መሰለሐት እግል ልበድሉ ወአርደት እግል ለአዋፊሕ እለን ወጅብ።

ለትትሐመድ ትልህዩ ለልትረኤ ዲብ ጅግረ አወላይ ዲቪዝዮን፡ 40 ዱረት ገልብሶ ዲብ ህለው፡ እት ሰር በህለት 20 ኪሎምትር ዱሊት ዲብ ዐለት ሾላተ፡ ሚላዊ ሳምሶን ምን ፈሪቅ ራህዋ፡ ሳይሞን ጸጋዝኣብ ምን ፈሪቅ ሰላም፡ ዘራኤክ አማንኤል ምን ፈሪቅ ሓድነት ምን አወላይ አስክ ሳልሳይ ለአተው ቶም።

እት ደንጎበ ህዩ፡ መትባድራይ ፈሪቅ ሓድነት ዳንኤል ክፍሎም፡ እግል ወድ ፈሪቁ አሚናዳብ አለም፡ ያፌት የማኔ ምን ፈሪቅ ራህዋ፡ ኤሽን ክፍሌ ወሴም ዳዊት ምን ፈሪቅ ሓድነት ወሳይሞን ጸገዝኣብ - ምን ፈሪቅ ሰላም እንዴ በድረ አወላይ ክም አተ፡ ወኪል ውካለት አክባር ናይለ ምዴርዮት እት ሀበዩ ሐብሬ አክደ።

ተጸሪክ ሐያት ፈናን በረከት መንግስት-አብ

በረከት፡ አክለ ሀገ፡ እበ ሕብዕት ልእክት ሐልዮቱ ወሽዑር ወጡት እት እንትበህ አባይ ሰበት ወድቀ፡ ወጠንዮቱም ህዬ ዝያድ ሰበት ዘሀረት፡ እት ሰነት 1975፡ እት ጀብሀት ተሕሪር ኤረትርዮ ፈግረ።

እት አስመረ እት ሀለ ዲብ መሕበር ሰቦ ትንዝመ፡ እት አዲስ አበባም አተላለ ዲብ። ሚዳን ክም ፈግረ፡ እት በርክ እግል ሰለሰ ወሬሕ ተድራብ ዐስከሪ ክም ነስኦ፡ እት “ወጠንያይ ቅስም ተዕቢኣት ሙሲቀት ወተማሲል” ትወዘዐ። ምን ሰነት 1975 አስክ 1979 ህዬ እትሊ ቅስም ክም ሐልያይ ወቄድራይ ሙሲቀት ሸቀ። “ታሪኽ ሃገር፡ ስምረት፡ ሎሚ ኣይኮነን ዓሚ፡ ድምጺ ሰወኣት፡ ተቐበሉኒ ብረተይ፡ ሃሪ ማዕተበይ፡ ብናይ ደርጊ ፈኽራ፡ እናበርህ ከይዱ ቅትዕ መትከል፡ ተልዓል ሓይሊ ሓፋሽ ኤርትራ።” ለልብል ሰውርያይ ሐልዮቱም ናይለ መደት ለሃ ቱ።

እት ክፍለት ሰነት 1979፡ መናድል በረከት መንግስት-አብ ጀብሀት ተሕሪር ኤረትርዮ እንዴ አዝመ ምን፡ ሱዳን አተ ወሐር አስክ ሰውድዮ ለጅኦ። ምን 1979 አስክ 1991 እት ሰውድዮ ፍርቀት ቢኤም እንዴ አሰሰ፡ ሐልዮት ብዙሕ አፍረ ወሽራይጡ ነሸረ። ሰቱድዮ-ኖሱ እንዴ ከስተ ህዬ፡ ናዩ ወናይ ጸሩ ኤረትርዮን ሐልዮት ሸራይዋ እት ጠቤዕ ወንሸር እት ፈን ሐዞት ውቅል አግደ። አሸዓር እት ለአፈግርመ እግል ሐልዮት ብዕዳም ሰደ። እት 1980ታት ሰውድዮ፡ መርከዝ ሐሰሳይ ሙሲቀት ወፈን ኤረትርዮ ዐለት። ኤረትርዮን ሙሲቀዮን፡ “ሰዳይት እግል ሰውረት ኤረትርዮ፡ ጠወሮት ኤረትርዮይ ዓዳት፡ አፍሸሎት ዐሚም ዓዳት መስተዕምረት” እንዴ ሀረሰው ከእብ ብዝሐ ሸራይዋ ወሐልዮት እተ ጠብዖ ዲቡ ለዐለው ወክድ፡ ለአግደ መዋልያዮም ‘በሃር በረከት መንግስት-አብ’ ዐለ።

ፈናን በረከት በዐል ቅድራት ብዙሕ ዐለ። ሻዕር፡ ሙለሕን፡ ዜብጣይ ወመመቅረሓይ ሙሲቀት፡ ወቄድራይ ፈን ጥዉር ቱ። አሸቃሉ፡ ለጠበዐ ወለኢትጠበዐ ሰኒ ብዙሕ ቱ። እት ዲስክ፡ ሪል፡ ሸራዮ፡ ወሲዲ ለጠብዐፍ ፈርያት ምን ዝያድ 50 ጥባዓት እት ገብኦ፡ ዝያድ 100 ምን ሐልዮቱ እብ ክሊፕ ትነሸረ።

እት ሐቲ መቃብሉቱ ረስሚ እት ሽዑብ ለትነሸረ ሐልዮቱ ዝያድ 300 ክም ቱ ሻሬሕ ዐለ። ወሳይቅ ክምለ ለሐብሩ ላኪን ፈናን በረከት፡ 583 ሐልዮት ውሱቅ ቡ። ለኢትወሰቃመ እግል ለህሌ ቀድር።

ፈናን በረከት ሐቆ ሕርዮት፡ “ጸሓይ ተወሊዱ፡ ብስምኩም፡ ንሕና ሃገር፡ ዓልምና፡ ህዝቢ ኤርትራ፡ ጽንዓት፡ ህዝቢ ዓለም፡ ባህልና፡” ለልብል ሸራይዋ ጠብዐ። እግል ውቅል ዶር ፈን እት አምጽኦት ሕርዮት ህዬ ክእነ ሐለ እሉ።

ሰውረት እት ታክብ ሰኒ እንዴ

ኢትአሳድር፡

ሸዕርን ወቆናና ቱ ማሚ ለሰልፍ ባድር

ክም ከረም ቅዝር ለጊማዩ ሀድር ንጋረት ክርና ለፍራስ ተአትፋግር ተመኒት ቃልና አሰናይ ለአማን ዳርር።

በሃር ፈናን በረከት መንግስት-አብ እት 1993 እት ኤረትርዮ እንዴ አቅበለ፡ ወራት ፈን እብ ለትወቀለት አተላለ ወሽራይጡ ደርብ ሕድ አተንከረ። ሐቲ ምን እመራት ናይ ሐቆ ሕርዮት ሐልዮቱ ህዬ፡ “አዕዋፍ ክራማት” ቱ።

ምሕርባይ መናድል በረከት መንግስት-አብ፡ ነፈር ናይለ እት ሰነት 1995 ለትአሰሰት ወአስክ 1996 እት ቀበት-ዐድ ወካርጅ ዝያራት ብዙሕ ለወዳት እብ ሕሰር ዓዳት ጀብሀት ሸዕብዮት ለቄመት እምር ፍርቀት ዓዳት “ሓደ ባህግና” እንዴ ገኦ፡ እት አትፋዘዕ ገቢሉ ግዴት ዐባይ ወደ።

ሐቆ እሊ ለወደዩ ወጠንያይ ወቀዩ እት ዕቅበት ሰያደት ምን ሰነት 1998-2000 ሰኒ ወድሐ። መናድል በረከት መንግስት-አብ ዋርሳይ’መ ገብኦ። ፍቲ ወጠን ወሕሽመት ሰያድተ ለሸሬሕ ሐልዮት እንዴ አፍገረ፡ እት ጀብሀት መጋብህት ትከሰኦ። “ባድመ፡ ተጨነቐ ሰማይ ተጨነቐ ባይታ፡ ሓይሊ ኣየርና ጎመራ፡ ‘ታይ ዝኸውን ምንባር፡’ ለልብል ውበዕድ ሐልዮቱ ምን ዘበናይ ሰዋሪክ ወልዐል ለትትፊተት ክርን ነባሪ መጋብህት፡ በታክት ወኤማን እት ፈርቅ፡ እት ኩሉ ጀብሀት መጋብህት እት ክልል፡ ሰባተት ዲሸን ወገቢልን እት ወቀሎት ሐዞቱ ወደ።

በሃር ፈናን በረከት፡ 65 ሰነት ምን ዕምሩ እት ፈን ሸቀዩን። ምስል ብዝሓም ፈናንን ውላድ ዐድ ወካርጅ ኡመር ወሻቂ ቱ። ዐባዩ አቶብዩን ፈናንን፡ እመራም ፈናንን ሱዳን ክም መሐመድ ወርዲ፡ አልካብሊ፡ ሰያድ ኸሊፋ ምስንዮት ሸቅል ትርድት ዐለት እሉ። ለእመር አምሪክ መላክም መሐመድ ዐሊ ክለይ እት መናሰበት ሐቲ፡ በረከት እንዴ ዐዝመ፡ ዓዳት ኤረትርዮ ሓለ እሉ ቱ።

በረከት እት ሰነት 1999 እብ ክእሉል ሸቅል ፈን፡ ጃእዘት “ራይሞክ” ትሰርገ። ምን ለትፈናተው ጀሃት ጀዋእዝ ብዙሕ ናስኦ ቱ። ኤረትርዮን ሰነን አሚሪክ ናይ ሕሸመት ርትብት “ደክተረት” ሀበዉ። ርኢስ ኢሲዮስ አፍወርቂመ ‘በሃር’ ወ ‘ራሃባ’ ለልብል ርተብ ሃይቡ ክም ቱ ፈናን በረከት ኖሱ ሻሬሕ ቱ። ‘በሃር’-እመር በሀለት እት ገብኦ፡ “ራሃባ” ላኪን፡ ምን “ራእሲ ሃገራዊ ባህሊ” ለትጨመመት ሰሚት አትሐጫር ቱ።

ፈናን በረከት መንግስት-አብ መደት ሐቲ “እግል ሽዑብ ኤረትርዮ ሚ ወቱልካሁ?” ክም ትሰኣለዉ፡ “ሽዑብ ኤረትርዮ እለ ሰበት ኢለአምረ እግል አሰኢሉ ቱ፡ እንዴ ትቤ ሐሲብ ኢልትቀደር። ሽዑብ ኤረትርዮ ላብብ፡ እት እሳት ለትለለዐ ከለፈግረ፡ እግል ዐዱ ለነፌዕ ለልአምር ሽዑብ ቱ።



ሰኢሊ አክሊል ዘርእዝረ



ፋዜዕ ወኩሉ ካድር ቱ። ወጠኩ ለፊቱ ሽዑብ ሰበት ቱ። “እብ ሕርዮት ወሕሽመት ልንበር” ብህል ቱ።

ምን ሰነት 1995 አስክ አምዕል እስትሸሃዱ፡ እብ ዋቅዮት መሻረከት ነፈር መሕበር ሙሲቀዮን ኤረትርዮ እንዴ ገኦ ለከድመ በረከት፡ እብ ደለ ገኦቱ መሰል ሰኔት ቱ። እት አሰል መጅተመዕ እንዴ ተንከበ ለልሸዕር ወለሐሌ፡ ነባሪ በህል ወተጸሪክ ሽዑብ ለልሐፍድ ወደርሱ፡ እግል ዓዳት ወጠን እብ አምር ለልትቃረም እሉ፡ ሰቡል በዐል ምህነት፡ ካድር ብቀዕ፡ መዋልያይ አጅያል ሐዲሱ አብ ወጠንያይ ለሐን፡ እግል ዐቦት ሙሲቀት ወጠን እምበል ሕላሌ ለናደለ መዋዋን ቃሊ ቱ። በረከት መንግስት-አብ፡ ርሐም፡ ክል-ዶል ደማን ነፍሰ ለዐለት እሉ፡ ፋውሽ፡ ዕጹም፡ እት ቢያን እብ ዐመል ለልአምን መፍርያይ፡ ሴድያይ ወመሳንዳይ ክም ዐለ መልህያሙ ወፈተቹ ሸርሐ።

ራሃባ በረከት መንግስት-አብ እት ሰነት 1962 ምን ኡዲሱ-አበበ አስክ ዐዱ እንዴ መጽኦ፡ ምስል አሰይደ ጽጌ ገብሬሃንስ ቃልክዳን አሰረ። አስክ ኡዲሱ-አበበ እንዴ አቅበለ እበ ህዬ፡ ዲቡ ምስል ነብር ዐለው። አሰይደ ጽጌ ህቲ እት ጀብሀት ክም ፈግረ እብ ሰበብ ብእስ ወሰውርያይ ወመዋቅፈ ወወራታተ፡ ምን ሰነት



1979 አስክ 1986 እግል ሰቦ ሰነት እት ሐብስ ዐለም-ብቀኝ ክልኦተን። መናድል በረከት ሐቲ ምን ሐለዩ ሐልዮቱ እግል እሲቱ ለትሸሬሕ እት ገብኦ፡ “ሓዳሪ ካባኺ ፡ ሃገረይ አፍቂረ-ጸዋይቹ፡ ምንዚ ወጠንዬ ፈቱት” ትብል። በሃር ፈናን በረከት መንግስት-አብ በዐል ፈረዕ ወአብ ሰቦ ምን ዘረት ቱ።

ክእነ መሰል ዐቢ ወሰቡል ምሕርባይ ፈናን አስክ ዳር-አማኑ እንሳሬሕ ዲብ ህሊኑ ለበይኣነ ሐዘን ክቡድ ቱ። ምሕርባይ መናድል በረከት መንግስት-አብ እበ ጸብጡ ለዐለ ሕማም እት ዮም 12 ኖቨምበር 2025 ቱ ዲብ እት እስብዳልዮት ቅዋት ጀው ለአስተሸህደ። ለሐልፈት ሰንበት-ዐባይ 16 ኖቨምበር 2025

ህዬ፡ ውቁላም ሰብ ሰልጠት ሕኩመት ወጀብህት፡ ቅያዳት ዲሸ፡ ሚርሐት ደያናት፡ ጸዋሁ ወአቃርቡ፡ ሽዑብ ወዴሽ ዲበ ሐድረወ ዓደት፡ እት መቅበረት ሹሀደኦ አሰመረ እብ ሕሸመት ትቀበረ።

ወጠንያይት መፈውድዮት ዓዳት ወርያደት እብ እስትሸሃድ ነፈረ ፈናን ገዲም በረከት መንግስት-አብ ለትሰመዐዩ ሐዘን እት ሸሬሕ፡ እግል ዓይለቱ፡ ፈተቹ፡ ወኩሉ ሽዑብ ኤረትርዮ ኤማን ወሰብር ለህብ ትብል።

ሕሸመት እግል ሰብ ወቀይ!
ዝክረት ዳይመት እግል ሹሀዳን!
ዐውቲ እግል ገቢል!